

Tatou faasoa ma talanoa i le malupuipuia o lo tatou atunuu:

FAATALANOAINA O SE TOFA
MAMAO I LE MALUPIIPUIA O LE
ATUNUU

Talatalaina o finagalo ma manatu o le
mamalu o tagata eseese i totonu o Aotearoa
Niu-Sila i lamatiaga e ono tutupu i le
malupuipuia o le atunuu, luitau ma avanoa

MARCH 2023



Te Kāwanatanga o Aotearoa
New Zealand Government

House of Representatives Public Service Act 2020, sch 6 cl 8.



2023 © Crown Copyright

Ua laiseneina le galuega leni i lalo o le Creative Commons Attribution 4.0 New Zealand licence. E leai se afaina o lou kopiina, tufaina ma suiga e te faia i le faamaumauga leni, ae ia faailoa o le galuega na saunia e le Department of the Prime Minister and Cabinet (DPMC) ma ia tausisia isi tuutuuga ua faia mo isi laisene. E te maua se kopi o le laisene leni i le creativecommons.org/licenses/by/4.0

Faamolemole ia manatua e le mafai na faaaoga se faailoga, po o se tagavai a se matagaluega po o le tagavai a le malo, po o le Coat of Arms i se auala e ono solia ai tuutuuga o ta'ua i le Flags, Emblems, and Names Protection Act 1981. E tatau na faailoa i se faamatalaga tusia le puletaofia a le Crown ma e le suia i le toe faia o soo se faailoga po o se tagavai po o le Coat of Arms.

Lomiga a le Department of the Prime Minister and Cabinet (DPMC), March 2023.

dPMC.govt.nz • information@dPMC.govt.nz

ISBN 978-0-947520-31-1 (initaneti), 978-0-947520-32-8 (lomiga)

Upu Tomua

Talofa lava

Tatou galulue ma le loto gatasi

O le National Security Long-term Insights Briefing muamua lenei ma e tulaga ese ai lava.

Na taimua le Department of the Prime Minister and Cabinet ma le Ministry of Foreign Affairs and Trade e fai ma sui o le Security and Intelligence Board i le faafoeina o le galuega lenei¹. Na faagasolo galuega e aunoa ma le aiaina e minisita ma le Malo o pulea le atunuu i le vaitaimi lenei, ma e tagai i suiga o le taatiaga o faiga o malupuipua ai le atunuu ma folasia nisi o avanoa mo le lumanai.

E aafia tatou uma i le malupuipua o le atunuu. Na matuai ogaoga aafiaga na feagai ma o tatou tagata mai talitonuga matuiā tele; o aafiaga mai osofaiga faainitaneti i a tatou pisinisi, matātā tau tupe ma le soifua maloloina; o le faaauau pea o le matautia o faiga maopoopo a tagata solitulafono faapea ma le soloia o tulaga tau pulega faavaomalo, ma le maopoopoga e maua mai ai, a o taumafai nisi o atunuu e pulepuletutū i mea o aiaina e isi atunuu.

A o tatou feagai pea ma aafiaga o le COVID-19 o salalau i le atu laulau, o le vave faatupulaia o suiga o le tau ma le vave salalau o faamatalaga sese ma le faasalalau ma le mautinoa o faamatalaga sese, ua faapena ona tofotofoina lo tatou malamalama i faiga faamata'ū faasaga i le malupuipua o le atunuu ma lo tatou gafatia ona tali atu i mea o tulai mai.

E tau auala atu i le oototoga lenei, le taulai o talatalaga ma le toatele o tagata eseese i Aotearoa Niu Sila i le malupuipua o le atunuu - matou te fia faasoa atu faamatalaga i nisi o aafiaga ma luitau e sili ona afaina ai le malupuipua o le atunuu. E tusa ma lo tatou tulaga o se tasi o malo aoao, e ia i tatou le pule e filifili ai auala tatou te tali atu ai. E avea le faatuputeleina o avanoa lautele e talanoa ai i le malupuipua o le atunuu, e mafai ai ona tatou nofo sauniuni ma faatupu le vave faafoisia o lo tatou malosi tatou te tali faatasi atu ai i luitau nei ma le malamalama fou i auala e agai ai i luma.

E momoli atu la matou faafetai ia i latou uma na faailoa mai manatu ma lo latou sao i le oototoga lenei. Ua matou faamaonia i talanoaga na faia le tāua o le malupuipua o le atunuu, ma le tāua o le faasoa atu i taimi uma o faamatalaga. O le tasi o auala e laasia ai lea faamoemoe o le faia o le oototoga lenei.

Na faavae le taatiaga o le oototoga lenei i fautuaga mai le matātā tau puipua o le atunuu, manatu o tagata lautele, faamatalaga i mea e ono lamatia ai le malupuipua o le atunuu i le lumanai, o suesuega faavaomalo ma faamaumauga faafuainumera o faamauina e le Statistics New Zealand.

E iai le faamoemoe e faaauau na tatou talatalaina le mataupu ua folasia nei ma le mamalu o Tagatanuu Niu Sila.

Ma le faaaloalo lava



Tony Lynch
Taitaifono, Security and Intelligence Board

Talofa lava

O le auga tonu na faavae ai le Long-term Insights Briefing o le puipuia ma le faatuputeleina o le malosi o faiga o malupuipuia ai Aotearoa Niu Sila – tatou tagata, tatou atunuu ma mea o tatou aiaina - ia tatou mafaufau lelei i auala e faatupu ai le soifua manuia i lenei vaitaimi ma ona tua atu.

E faaulutalaina le faalauiloaina o le talatalaga o le **Talatalaina o finagalo ma manatu o le mamalu o tagata eseese i totonu o Aotearoa Niu Sila i lamatiaga e ono tutupu e afaina ai le malupuipuia o le atunuu, luitau ma avanoa.**

Aemaise lava, i le mau aafiaga ma luitau i le malupuipuia o lo tatou atunuu - e pei o osofaiga faainitaneti, faiga faaterorisi, talitonuga matuiā, faasalalau ma le mautinoa o faamatalaga sese, ma soligatulafono maopoopo. O loo folasia ai nisi o manatu e lagolagoina ai le malosi ma le faatuatuaina o le malupuipuia o le atunuu, e aofia ai le talatala o manatu o Tagatanuu Niu Sila e tonu ma talafeagai i le mataupu o faatalanoaina.

E lē o se mataupu faigofie le faatalanoa o le malupuipuia o le atunuu, ae agatonu lo tatou faatalanoaina auā le faamautinoaina o le saogalemu ma le malupuipuia o Niu Sila i le lumanai mo ē o nonofo, galulue ma asiasi mai i le atunuu. E iai lo matou talitonuga o le saunia e le malo o talatalaga e lē taomia ai manatu, e faaaofia uma ai tagata, ma e faigofie na auai ai, e maua ai le faatuatuga ma le talitonuga mautinoa, ma faamalosi atili ai le malupuipuia o le atunuu. E tau auala atu i le ootoga leni se faamoemoe e siitia ai le malamalama ma le iloa i le malupuipuia o le atunuu. Matou te talotalo o le amataga leni o se talatalaga ma felafolafoaiga sili atu i le lumanai.

O le tala na faavae i ai le ootoga leni

O Long-term Insights Briefings o se auala fou e faatino ai galuega e matagaluega a le malo, e aunoa ma le aiaina e Minisita o matagaluega nei, e sailiili ma lipotia faaletonu e tāua i le lumanai o le soifua manuia o tagata i Niu Sila.

O le tasi o fautuaga mo le malo mai le **Royal Commission of Inquiry** i le osofaiga faaterorisi i le malumalu muselemi i Kalaiesetete le toe iloilo o auala e mafai ai ona auai tagata - ia atiae se siosiomaga e maua ai e Tagatanuu Niu Sila uma le saogalemu ma le faaaofia o i latou. Matou te fia faaoga le ootoga leni e mafai ai ona matou laasia tulaga nei i le vaitaimi mamao, e maua mai ai ou manatu ma tau saili faiga e atiae ai foliga o le malupuipuia o le atunuu i le lumanai.

E iva matagaluega a le malo na tuufaatasia le ootoga leni ma o le matafaioi a matagaluega nei le puipuia o Niu Sila mai mea e afaina ai le malupuipuia o le atunuu. E faavae i luga o se suesuega

lautele, suesuega ma faatalatalanoaga ma le mamalu o le atunuu sa faia. Na matou iloa ai le tāua i Tagatanuu Niu Sila o le malupuipua o le atunuu, o le fia malamalama i galuega o taumafai atu i ai, ma fai so latou sao i fuafuaga mo le malupuipua o le atunuu i le lumanai.

O se tulaga lea e avea ma faalaeiau, auā e avea le faatuputupulaia o le lavelave o aafiaga i le malupuipua o lo tatou atunuu ua tatau ai le faaaofia o Tagatanuu Niu Sila uma i taumafaiga ua tatou faia e puipua ai lo tatou atunuu mai lamatiaga.

E faaoga e le ootoga leni suesuega ma faamatalaga na matou maua mai tagata, pisinisi, ma matagaluega a le malo e tagai ai i tulaga nei:

- suiga autu o vaaia i le atu laulau e aafia ai le malupuipua o Niu Sila i le isi 10 tausaga o sosoo ai ma faasolo atu i le 15 tausaga
- o nisi o aafiaga ma luitau i le malupuipua o le atunuu ma e faapefea ona suia i le isi 10 faasolo atu i le 15 tausaga
- o vaega autu e ono lagolagoina se lumanai malosi mo le malupuipua o le atunuu i le lumanai.

O se faamanatu, e ui i le saunia o le ootoga leni e aunoa ma le aiaina e minisita ma e lē o se taiala faavae a le Malo, ua tusia i le vaitau o faia ai le mau taiala faavae a le Malo mo le fia faia o suiga i le malupuipua o le atunuu - aemaise lava i le New Zealand's first National Security Strategy ma le toe iloilo o matafaioi ma le faataatiaga o le faiga faavae o le malupuipua o le atunuu (e pei ona fautuaina e le Royal Commission of Inquiry i le osofaiga faaterorisi i le malumalu muselemi i Kalaiesetete).

*O loo tau saili foi i le ootoga leni manatu autu tai tutusa ma isi Long-term Insights Briefings na saunia e le malo- aemaise lava i le ootoga na faia e le Public Service Commission “**E faapefea ona tatou faaleleia atili le auai o le mamalu o le atunuu i meafai a le malo i le lumanai?**” ma le ootoga na taimua ai le Department of Internal Affairs o talatala ai le fesili “**E faapefea na faaoga tekonoosi e faaleleia ai le auai o tagata lautele ma taupulega fai?**”*

Mai le amataga lava - suesuega ma talatalaga

E tele alagaoa o faamatala ai le malupuipua o Aotearoa Niu Sila na mafai ai ona matou tuu faatasia le ootoga leni.

Na aofia i la matou suesuega:

- faamatalaga mai matagaluega a le malo o aafia i le faiga faavae e tausia ai le malupuipua o Niu Sila.²
- o le **National Security Public Survey**³ - o se suesuega tutoatasi na faia ma le 1,000 ma ona tupu tagata o nonofo i Aotearoa Niu Sila, ma e iai la matou faamoemoe e toe fai i tausia taitasi. Na taulai le suesuega i manatu, lagona, ma le malamalama o Tagatanuu Niu Sila, ma le mau aafiaga i le malupuipua o le atunuu, luitau ma avanoa i Aotearoa Niu Sila.
- manatu faaalua mai uluai faatalalanoaga o le mataupu - na matou maua ai manatu tusia e 105 mai le mamalu o le atunuu, faalapotopotoga ma pisinisi. Na lagolagoina e manatu nei le mataupu, ma na faaalua e i latou na auai le moomia o le toe mafaufau i le tele o aafiaga i le malupuipua o le atunuu ma luitau ma ia faia se faiga e lē noatia ai le faaali o manatu ma galulue soosoo tauau ai i faatalanoaga o le malupuipua o le atunuu. E mafai na e faitau i se aotelega o manatu faaalua i le <https://dpmc.govt.nz/our-programmes/national-security/national-security-long-term-insights-briefing/ltib-topic>
- talanoaga ma tagata na auai tino ai ma luga o fesootaiga faatekonolosi, e aofia ai talanoaga ma tagata na faatoa sulufai mai i le atunuu ma ituaiga tupuaga eseese na faafoe faatasi ma le Ministry for Ethnic Communities.
- manatu faaalua i le mataupu na faatalanoaina - na maua mai ai manatu tusia e 45. E mafai na e faitau i le aotelega o manatu faaalua i le: <https://dpmc.govt.nz/our-programmes/national-security/national-security-long-term-insights-briefing>
- faamaumauga ma suesuega o mafai e le mamalu o le atunuu ona maua mai Niu Sila ma atunuu mamao.

O iuga na maua mai suesuega ma faatalalanoaga ma le mamalu o le atunuu na mafai ai ona matou maua se malamalamaaga loloto i le faauigaina e Tagatanuu Niu Sila o aafiaga i le malupuipua o le atunuu, luitau ma avanoa. O faamatalaga nei na mafai ai ona matou tuu faatasia le ootoga leni - ma matou faailoa vaega tonu e mafai ai na matou saunia le mau faamatalaga ma maua gofie ai.

O itu na matou maua – e tāua mo lou silafia

O faamatalaga na matou aoina mai le National Security Public Survey, manatu faaalua, suesuega ma isi alagaoa lautele, na aliali mai ai vaega autu e tolu o loo fai ma popolega i le lumanai o le malupuipua o le atunuu.

Na aofia i la matou suesuega:

- E iai le talitonuga i Tagatanuu Niu Sila o loo faatuputupulaia le faamata'uina o le malupuipua o le atunuu
- o mea o tutupu i le atu laulau ma le faatuputupulaia o suiga ua afaina tele ai le malupuipua o Niu Sila, ma le
- eseese o talitonuga mautinoa i le gafatia e le malo ona tali atu.

Na aofia i le National Security Public survey le tele o ituaiga faiga faamata'u, aafiaga ma luitau i le malupuipua o le atunuu. O le vaaiga lautele leni ua mafai ai ona matou malamalama atili i le faauigaina e le mamalu o le atunuu o le tele o ituaiga faaletonu, ma e mafai ona tatou faatusatusaina i iuga o suesuega na faia i atunuu mamao.

Na maua mai le suesuega leni, le telē o se faamamafa e Tagatanuu Niu Sila faatusa i tagata o isi atunuu o faiga faamata'u.

E lē o se mea fou i Tagatanuu Niu Sila le nofo popole i mala faalenatura, talu ai le lamatia gofie i mafuie, lologa, oge ma mauga mu. E tutusa lava i tatou ma isi atunuu e sili ona afaina gofie i mala faalenatura. E limataitaiina le malo i se faiga tuufaatasia e tali atu ai i mala faalenatura, ma e taulai galuega ma taumafaiga e: tuuitiitia, sauniuni, tali atu ma toe faaleleia ai le atunuu. E maua nisi faamatalaga i le faiga tuufaatasia leni i le www.civildefence.govt.nz/cdem-sector/the-4rs/.

E lē o galo i tagata le salalau ai o faamai, a o tatou faia pea galuega e tali atu ai i aafiaga faifai pea o le COVID-19. E maua nisi faamatalaga i faiga na tali atu ai i le www.health.govt.nz and <https://covid19.govt.nz/>.


“ E TELĒ SE FAAMAMafa E TAGATANUU NIU SILA FAATUSA I TAGATA O ISI ATUNUU O FAIGA FAAMATA'U.”

National Security Public Survey

F. O le ā sou iloa i le moni o le faamata’uina mai nisi o mea o ta’ua i lalo i le isi 12 masina / 10 tausaga o sosoo ai?

Alagaoa: 2022 IPSOS National Security Public Survey (Iomiga Oketopa 2022).

Manatua, o faamatalaga sese o ta’ua e aofia uma ai faamatalaga sese ma le faasalalau ma le mautinoa o faamatalaga sese



O le mea sili ona maitauina mai le ootoga lenei o le popolega maualuga i tagata o faiga faamata'u o faia e tagata po o atunuu o tau lamalama e faatupu lamatiaga i lo tatou atunuu (e masani ona ta'ua o "tagata faatiga lotu"), e pei o le soli faagaoi (osofaiga e tagata solitulafono o tekonoosi ma atunuu o lagolagoina tagata faatiga lotu e ave faagaoi, faailoa, suia, taofia pe faatama'ia faamatalaga e auala atu i le soli o faiga e puipuia ai komepiuta mo le fia maua o faamaumauga), po o soligatulafono maopopo (gaioiga soligatulafono i tuaoi o atunuu). O faiga faamata'u lona lua o fai ma popolega maualuga i tagata i le isi 12 masina o sosoo ai o le salalau o faamatalaga sese (o faamatalaga sese o ta'ua e aofia ai faamatalaga sese ma le faasalalau ma le mautinoa o faamatalaga sese).

Ua faaalua mai le suesuega le faatuputupulaia o le popole mo se vaitaimi faaumiumi mai nisi o ituaiga faiga faamata'u nei, e aofia ai le faia e se atunuu ese po o se tagata o faamalosia Niu Sila, o se atunuu o faamata'uina mea o aiaina e Niu Sila i le Atumotu Pasifika ma avanoa e mafai ai ona auai Niu Sila i se feteenaiga e faaoga ai auupega malolosi.

Na matou maua foi, e auala atu i le suesuega ma faalatatalanoaga ma le mamalu o le atunuu o le mataupu, le fia maua e tagata o le tele o faamatalaga ma faatalanoa atili ituaiga faiga faamata'u nei i le malupuipuia o le atunuu.

Taulaiga o le ootoga lenei

Toe tōmanatu i manatu o matagaluega o aofia i le tau atinaega o le ootoga lenei faatasi ai ma mea na maua mai le suesuega ma faatalatalanoaga ma le mamalu o le atunuu, ma o le a matou taulai i suiga ma faaletonu e patino i ai atugaluga, e aofia ai faiga faamata'u faasaga i le malupuipuia o le atunuu:

- Faasalalau ma le mautinoa o faamatalaga sese
- Soli faagaoi ma osofaiga faatekonolosi
- Soligatulafono maopopo faavaomalo
- Alalai mai o isi atunuu ma faiga faa-agaaga
- Faiga faaterorisi ma talitonuga matuiā
- Luitau o le vave faafoisia o le malosi i atumotu Pasifika.

E avea le faasoa atu o faamatalaga nei, matou te tuuina atu ai le lagolagosua e faatupu ai le malamalama sili i le mamalu o le atunuu ma faatalatalanoaga e uiga i le malupuipuia o le atunuu.

E afaina le malupuipua o Niu Sila i suiga o tulai mai i le atu laulau

O faiga faamata'ū i le malupuipua o le atunuu e lē o se mea e ese se paneta o tupu ai. Na ioeina e tagata mea ua matou iloa e tusa ai ma le vave o fesootaiga ma le faatautavā o suiga ua iai nei faatusa i se isi lava vaitaimi, ma ua faatuputupulaia ai aafiaga leaga ona o mea o tutupu ma suiga faavaomalo i le malupuipua o Niu Sila.

O isi tulaga o faamoemoe atu i ai mo le isi 10 i le 15 tausaga, e pito aafia tele ai le malupuipua o le atunuu, ma nisi o tulaga e muai afua mai, suiga autu e fa i le atu laulau:

- **O le faatuputupulaia o faiga faatautavā** i le va o atunuu, ma le faaititia pea o 'faiga tonu faavaomalo e faavae i luga o tulafono' (o le faiga faavae aoao i le atu laulau e faavae i luga o tulafono, aga taualoa ma faalapopotoga e lagolago le galulue faatasi o atunuu, ma e uunaia ai faiga e maua ai le tofilemu, e mafai ona mate'ia ma maopopo).

E avea le lagolagoina e Niu Sila o taupulega faavaomalo e faavae i luga o tulafono o se tulaga tatou te manuia ai mai saofaiga tofilemu ma isi atunuu. Peitai, e iai la matou talitonuga o le a faatuputupulaia pea le faia o faiga faamata'ū faasaga i tulaga tau pulega faavaomalo ona o le feteenai o manatu ma sini autu ma le faiga faavae lenei ma e tau saili auala e faaleaogāina ma lafoai ai. O faiga nei na tatou molimauina talu ai le osofaiga e Russia o Ukraine. E ui i le pito aafia tele ai o Europa ma isi atunuu ma faaauau pea ona aafia ai, o le osofaiga lenei ua solia ai tulafono faavaomalo, ma ua afaina tele ai tulaga tau pulega faavaomalo ma e afaina ai ma tagata o le atu laulau.

E tusa ma faalavelave faapenei mo Niu Sila lava ia, o le atili faaititia o pulega faavaomalo e faatuputupulaia ai faiga faamata'ū i le malupuipua o le atunuu ma e faapena foi ona avea ma luitau sili mo i tatou o taumafai e tali atu ma puipua mea o tatou aiaina.

- **O suiga tau tekonoosi** o le a aafia ai vaega uma o le soifuaga, e atiae ai faamanuiaga mai suiga tetele ma siitia ai tulaga lelei o le soifuaga ae faapena foi ona aliae mai ai ma aafiaga fou ma luitau. E aafia ai ma atinae faifai pea, mo se faataitaiga, tomā faatekonosi, tekonoosi faaletino, ma le faatupu o mea moni o vaia. E ui i le faigata ona tau mate'ia o le sa'o o suiga nei, e lē o lilo foi i manatu le faatuputupulaia o le vavalalata o fesootaiga mai tuluiga o le atu

laulau ona o le vave o suiga fou i tekonoosi. E iai nisi o le a taumafai e faaoga tekonoosi fou ma tekonoosi foufou mo faiga leaga ma faatupu ai lamatiaga.

- **O suiga i le tau** e afaina ai le maua o le suavai, meaai, ma eleele e mafai ona nofoia - o tulaga nei ua aliae ai faiga faatautavā ona o le utiuti o punaoa ma suiga i feoaiga a tagata. O le faateteleina o tulaga loulouā o le tau ma mala faalenatura o le a afaina ai le gafatia e atunuu ona toe foi i se tulaga lelei.
- O le a faifai pea ona afaina, faalavelavea ma aafia ai le tamaoiga, soifuaga ma faiga faaupufai ona o le COVID-19 ma **faamai salalau i le atu laulau** i le lumanai.

E lē gata i suiga ma aafiaga e lē mafai ona taofia, e faapena foi le suia o foliga o tagata i Niu Sila - ua tatou faasolo ina matutua ma atili eseese ituaiga tagata ma faatuputupulaia le toatele o tagata e nonofo i taulaga. E iai la matou talitonuga e moomia ona tatou tali atu i suiga nei i le faia o se suiga i auala o tatou fesootai ai ma Tagatanuu Niu Sila ina ia uunaia faiga e atili ai ona faaafia tagata uma ma mafai ai e tagata ona auai. O se suiga e mafai ai e le malo ona atiae le faatuatuga ma tali atu i manaoga o i latou nei, ma faamautinoa o tatou malamalama uma i aafiaga, luitau ma avanoa ua fetiaia'i ma i tatou. Ua valoia le tulai mai o suiga nei seia oo atu i le 2038:⁴

- O le a faatuputupulaia le faitau aofai o tagata i Niu Sila mai le 5.08 miliona faasolo atu i le 5.88 miliona, ma o le toatele e nofoia taulaga (71 pasene)
- o le a atili eseese ituaiga tupuaga o le atunuu, ma e valoia le faatuputupulaia o tagata Pasifika, Māori ma tagatanuu Asia
- ua faasolo ina matutua tagata o le atunuu, ma o le faatusaga masani o le matua e amata mai i le 37.4 tausaga (2018) faasolo atu i le 42.2 (2038) ma le faaluaina o le aofai o tagata i luga atu o le 65 tausaga i le 1.3 miliona (2038).

O le ā le uiga o nei suiga i le malupuipua o le atunuu i le lumanai?

E faamatalaina aafiaga o tulaga nei ia i tatou i le lumanai, e **manatu e tolu e lei faamaonia**. O lo o folasia mai ai se aotelega o suiga i le atu laulau e mafai ona aafia ai faiga o faamata'uina ai le malupuipua o le atunuu, ma tulaga e tataua ona tatou tali atu ai. E iai taimi e faigata ai ona tau mate'ia suiga ma mea e tutupu. O le fesuisuia'i pea o faiga faamata'u e avea lea ma tulaga e faigata ai ona iloa taunuuga e oo iai. **O le isi 15 tausaga o sosoo ai, atonu o le a tatou vaaia...**

Le faasolo pea ona tuutiitia

E tele atunuu, e aofia ai atunuu malolosi, o loo taumafai atili e uunaia mea o latou aiaina, ma le iloa e afaina ai o latou aga tausili ma mea o aiaina. O le a sili atu le tele o avanoa e ono tulai ai se feteenaiga e faaoga ai auupega malolosi i le va o atunuu ona o le faalavelave o talitonuga lotonuu e taofia maopoopoga faavaomalo. E faaitiitia maopoopoga i le va o faalapotopotoga tetele, ma faafaigata atili ai ona ausia luitau o afaina uma ai tuluiga o le atu laulau, e pei o suiga o le tau. O faiga faatautavā mo punaoa (malosiaga faaeletise, meaai, ma le suavai), ma suiga i feoaiga a tagata, e faatupu ai avanoa e feteenai ai le va o atunuu. O le atili faaitiitia o taupulega faavaomalo e avea ma avanoa e faatupu ai soligatulafono maopoopo, e aofia ai faiga faainitaneti, o le fai ma le mautinoa e isi atunuu o faiga e alalai ma faalavelave i mea o faavae ai lo latou ola ma le soifua - e aofia ai osofaiga faainitaneti ma

faiga faa-agaaga. O taumafaiga a tagata faatiga loto e faalavelave i faiga faatemokarasi o aveea pea ma popolega ia i tatou. O le tele o fevaevaeaiga i lo tatou atunuu e mafai ai ona aveesea le faatuatuaga i faalapotopotoga a le malo, ma le faatuatuaga i le va o tagata. E itiiti se malamalamaaga tutusa i le mamalu o le atunuu e tusa ma luitau o vagavagaia i tatou i totonu lava o Niu Sila, ma o le faasolo ina matutua o le faitau aofai o tagata, o le aveavea'i pea o faiga lē tutusa ma suiga i faiga faatekonolosi ua lē moomia ai tagata e faatinoa galuega, e mafai ai ona lamatia gofie nisi o tagata i talitonuga fouvale faasausili o loo salalau i luga o le initaneti ma tosina ai manatu ona o faamatalaga sese ma le faasalalau ma le mautinoa o faamatalaga sese.

Maoae le tifatō

O loo faaauau pea feteenaiga i Europa, ma o loo faatino puipuiga i Ukraine mai osofaiga, ma ua aafia atu ai ma isi atunuu ma ua atili telē ai le afaina mo se vaitaimi umi. E pei o le emo o mata le faaaoga o auupega faanukelia. E lē o punitia le iai o feteenaiga i totonu o le Indo-Pacific, mo se faataitaiga, e auala atu i le faitau sese o le Taiwan Strait, ma/po o le siitia o faiga faamiliteri i totonu o le Pasifika. Ma o tua atu o tulaga nei le televavave ma le faigata ona taofiofi o faalavelave e tulai mai ona o suiga o le tau. O le mafuaaga foi lena, o loo ave pea le faamuamua e nisi o atunuu o mea o latou aiaina e ui i le afaina ai o isi, ma faiga tuusa’o faatautavā mo punaoa (malosiaga faaeletise, meaai, ma le suavai). I lo tatou lava atunuu, e vave lava le oo mai o faiga faamata’u i le malupuipua o le atunuu ma afaina ai o tatou tagata. E avea se osofaiga mata’utia faatekonolosi, e faamoemoe e afaina ai le atu laulau atoa po o le afaina sa’o ai na o Niu Sila e faaleaogā ai auaunaga faainitaneti o faalagolago i ai lo tatou soifuaga i aso uma ma e afaina ai pisinisi, auaunaga faalesoifua maloloina, ma atinae tetele tau feoaiga. O le utiuti o punaoa, ma le itiiti o faamatalaga o faasoā atu ma le salalau o faiga faatekonolosi maoae e uunaia ai le faia o faamatalaga sese ma le faasalalau ma le mautinoa o faamatalaga sese, o tulaga nei e faafaigata ai e tagata ona iloa le eseese o mea pepelo mai mea moni. Ua sili atu ona eseese manatu ma talitonuga o tagata i totonu o Niu Sila faatusa i se isi lava vaitaimi, ua tuutiitia le faatuatuga i le va o tagata, faapea tomā faapitoa, ma pulega a le malo, ma ua lamatia ai faiga faavae faatemokarasi e talia ai soo se manatu, talitonuga ma tagata.

O se vaaiga mautinoa ma sili atu le lelei

E ui i le tumau ai pea o le faamalosiā o faiga faavaomalo tonu, e lē o aveesea ai le naunau o atunuu e tali atu i luitau o afaina ai le atu laulau e pei o suiga i le tau, ma galulue faatasi e tuutiitia faiga faamata’u i le malupuipua o le atunuu, a o taofia tagata faatiga lotu e tali atu i faiga sese o latou faia. O le galulue soosoo tauau faavaomalo, faiga fou faatekonolosi, ma le faafaigaluega o atinae e tali atu i suiga o le tau, o tulaga uma nei e uunaia ai le faasoā o punaoa, e fesoasoani e alofia ai feteenaiga tuusa’o ma le faaaoga o auupega malolosi. E avea le manino lelei o auala o faatino ai galuega, e lē o noatia ma e maua gofie faamatalaga o faasoā atu, talatalaga ma faiga faapaaga i le va o le malo ma tagata lautele, e siitia ai le faatuatuga, talitonuga mautinoa, ma le talafeagai ona tali atu i luitau e afaina ai le malupuipua o le atunuu. E tulaui galuega o faia e matātā auā le malupuipua o Niu Sila i faiga e talafeagai i le lumanai ma e gafatia na suia, ma tatou tutū faatasi o se atunuu e tasi e puipui ma faalauiloa mea o tatou aiaina auā le malupuipua o le atunuu ma lagolagoina le tupu olaola o tatou tagata.



Aafiaga ma luitau o le malupuipuia o le atunuu

**UA TATOU OO MAI I LE VAEGA
TONU LAVA E TATAU ONA TATOU
VAAVAAI LELEI AI I NISI O AAFIAGA,
FAIGA FAAMATA'U MA LUITAU E
PATINO I LE MALUPUIPUIA O LE
ATUNUU O LOO FAI MA POPOLEGA
IA I TATOU, MA O FAIGA O LOO
TU'ITU'I ATU PEA I LE SUESUEGA
MA TALATALAGA ATOA.**

Aafiaga ma luitau o le malupuipua o le atunuu

Ua tatou oo mai i le vaega tonu lava e tataua ona tatou vaavaai lelei ai i nisi o aafiaga, faiga faamata'u ma luitau e patino i le malupuipua o le atunuu o loo fai ma popolega ia i tatou, ma o faiga o loo tu'itu'i atu pea i le suesuega ma talatalaga atoa.

- Faasalalau ma le mautinoa o faamatalaga sese
- Soli faagaoi ma osofaiga faatekonolosi
- Soligatulafono maopoopo faavaomalo
- Alalai mai o isi atunuu ma faiga faa-agaaga
- Faiga faaterorisi ma talitonuga matuiā
- Luitau o le vave faafoisia o le malosi i atumotu Pasifika.

Mo aafiaga po o luitau taitasi o le a matou faaafia ai:

- le faamatalaina
- manatu na faaalua e auala mai i la tatou suesuega
- o auala e mafai ai ona tatou iloa suiga i le isi 10 i le 15 tausaga o sosoo ai
- o nisi o galuega o matou faatinoina e sauni ai mo le lumanai.

Ma le vaega mulimuli o le ootootoga lenei, o le a folasia ai nisi o manatu e lagolagoina le malupuipua o le atunuu i le lumanai i se vaitaimi mamao, e aafia

ai mafuaaga e tāua ai le faateleina o talatalaga ma Tagatanuu Niu Sila.

O luitau mai le faasalalau ma le mautinoa o faamatalaga sese (ma faamatalaga sese)

Faasalalau ma le mautinoa o faamatalaga sese o le faia ma le mautinoa o faamatalaga sese po o le suia o faamatalaga ma le mautinoa ma faasoa atu ma le faamoemoe e faatupu ai lamatiaga po o se isi faamoemoe sili atu.

E sili atu ona avea ma popolega ia i matou le faasalalau ma le mautinoa o faamatalaga sese ona o le faatuputeleina ai o le afaina o le malupuipua o le atunuu. E aafia ai faiga faatemokarasi i le atu laulau atoa, ma tafiese ai faatuatuaga i pulega, ma lo tatou gafatia ona tali atu pe a tofotofoina.

E eseese ituaiga faiga o faasalalau ai ma le mautinoa faamatalaga sese ma e tele ituaiga lamatiaga e tulai mai ai, mo se faataitaiga o le faalauiloa o talitonuga faasausili; faatupu ai le vevesi o feeseeseaiga ma fevaevaeaiga i totonu o le atunuu; ma le faasalalau o faamatalaga e ono faatupu ai le tiga ma e lamatia ai vaega o tagata toalaiti. O le tauluga o le faasalalau ma le mautinoa o faamatalaga sese e mafai ai ona aliae talitonuga faasausili ma le vevesi pe a manatu ai tagata e faatino mea ua latou talitonu i ai.

E patino lava luitau pe a patino foi i se atunuu ua afaina ona o le faasalalau ma le mautinoa o faamatalaga sese. A lagolagoina e isi atunuu faiga faapenei, e avea lea ma auala e atili malosi ma faatumauina ai faiga e faailoa ma le mautinoa o faamatalaga sese, e faaoga ai punaoa tetele ma e patino i le

tuleia o faamatalaga sese po o le taufaasese i
luga o le initaneti e tusa ma manatu po o
mataupu e t̄ua i Tagatanuu Niu Sila.

Mo se faataitaiga, na ta'ua i se lipoti mai suesuega auiliili na saunia e le Microsoft le noatia o Tagatanuu Niu Sila i faamatalaga sese na fai ma le mautinoa e afua mai Russia po o le faasalalau i le initaneti o faamatalaga sese talu na mavae atu Tesema 2021, ma o le tele o faamatalaga nei e fesootai i le COVID-19.⁵ Na faaosofia ai ma le mau solo tetee faasaga i faiga e tali atu ai i le COVID-19 ma isi mataupu i totonu o Niu Sila.

A faatusatusa i isi atunuu, e maua atu le faatuatuaga i Niu Sila o ofisa faasalalau a le malo ma faalapopotoga a le malo. E iai le popolega ia i matou i le faaleaga o le faatuatuaga ma le faaleaogāina o le malupuipua o le atunuu ona o le faasalalau ma le mautinoa o faamatalaga sese. E mafai foi mai le faasalalauina ma le mautinoa o faamatalaga sese ona afaina ai le felagolagomai o tagata (o tulaga e lagona ai e tagata uma le saogalemu, faatāuina ma le amanaiaina, ma le lagona talisapaia ma le mafai ona auai atoa i mea faitetele).

O le aunoa ma mea e noatia ai ma le sopoia o tuluiga uma o le lalolagi i faiga faainitaneti ua mafai ai ona faasoa faamatalaga ma fesootaiga a tagata i itu uma o le atu laulau. Ae ui foi i le aogā ma le tāua o le initaneti, o se faiga malosi foi e faasalalau ai faamatalaga e faafoliga o ni faamatalaga moni toe faatuatuaina ae leai. A faasoa atu faamatalaga sese nei e se tagata ma le manatu o ni faamatalaga moni, e ta'ua lea o **faamatalaga sese** - faamatalaga e lē moni pe taufaasese, ma e lē o faia i se agaga tonu po o le faasoa ma le faamoemoe e faatupu ai lamatiaga. O auala nei, ua faaaau ai pea le salalau o faamatalaga e lē moni ma le taufaasese, aemaise lava i fesootaiga televavave - ma e ui i faiga ua faia e nisi o kamupani tau fesootaiga televavave e taofia ai faaletonu faapenei, e tumau pea le iai o luitau nei, ma o le taumafai ia paleni le faatuatuaina o faamatalaga ma le saolotoga e faaali ai manatu ua faafaigata tele ai taumafaiga e tali atu ai.

“ O SE FAAFITAU LI LEA NA VAAIA I TAUSAGA E TELE UA MAVAE ATU NEI. TALU AI LE SIITIA O FAIGA FAAINITANETI MA FESOOTAIGA TELEVAVAVE, UA SILI ATU LE MAFAI ONA MAUA E TAGATA O FAAMATALAGA, E UI LAVA E LĒ MONI, AE O FAAMATALAGA O LAGOLAGOINA AI O LATOU TALITONUGA.” MANATU FAAALIA SUI AUAI O LE SUESUEGA

O le salalau ma le mautinoa o faamatalaga sese ma faamatalaga sese e aafia ai lo tatou gafatia ona tali atu i luitau e pei o le COVID-19, e faavae i le tutusa o le malamalama i faamaoniga ua maua. E iai le popolega ia i matou i le tumau ai pea ma le vave saosaoa o lea ituaiga luitau i le lumanai.

Mai le National Security Public Survey na faia talu ai, na maua mai ai manatu i itu nei:

- e tulaga muamua i le lisi o faiga faamata'u i le malupuipua o le atunuu faamatalaga sese (e ta'ua 'faamatalaga sese' e aofia ai faamatalaga sese ma le faasalalau ma le mautinoa o faamatalaga sese)
- o le 84 pasene o tagata na tali mai i le suesuega na faailoa lo latou talitonuga i le moni o lamatiaga ona o faamatalaga sese i mataupu e tāua i tagata lautele i Niu Sila i le isi 12 masina o sosoo ai

- o le 25 pasene na ta'ua e sili atu nai lo se isi lava mea le avea ai o faamatalaga sese ma lamatiaga ia i latou ma o latou aiga
- e avea faamatalaga sese ma faiga faamata'u i le taimi nei ma le isi 10 tausaga.

O le tele o faamatalaga sese o faasalalauina ma le mautinoa e lē o solia ai se tulafono ma e faamalieina ai faamatalaga o faaupuina ai le puipuia o manatu - ma ua faafaigata ai po o le lē talafeagai ona faia o se tali atu e faaoga ai metotia tuai e faamalosia ai le tulafono ma metotia aogā na auiliili a o lei aliali ifo ni lamatiaga. E moomia le galulue faatasi o le malo, tagata ma tomai suesue, ma kamupani tau tekonoosi ma ofisa faasalalau, e taofia le faasalalau i luga o le initaneti o feau e lamatia ai, a o puipuia foi i le saolotoga o tagata e faaali o latou manatu ma le leai o ni noataga i le faaogaina o le initaneti.

O nisi o tagata i Niu Sila, ua loa tausaga ma augatupulaga o fetaia'i pea ma faiga lē tutusa, o le tuulafoaiina po o le faailoga tagata (e aofia ai le faailoga lanu) ma le leai o se faatuatuaga i le malo ma ofisa faasalalau. Ma o manatu nei, e faigofie ai lava ona faia ma le mautinoa o le faasalalau o faamatalaga sese, aemaise i tagata faatiga loto ma isi atunuu o tau saili se fevaevaeaiga i lo tatou atunuu ma uunaia feeseeseaiga i le va o tagata eseese.

Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:

- le siitia o le saosaoa ma le maoae o le faasalalau ma le mautinoa o faamatalaga sese. E iai isi atunuu o loo taumafai ma le mautinoa e faatupu le vevesi, aveese le faatuatuaga ma fevaevaeaiga o Tagatanuu Niu Sila. O se tulaga e faatumauina ai faiga faamata'u ia tatou faiga faatemokarasi ma le malupuipuia o le atunuu
- o tekonoosi fou ma ituaiga ua fougou mai e ono siitia ai faafitauli e afua mai le faasalalau ma le mautinoa o faamatalaga sese, e aofia ai ituaiga faasalalau e otomeki ona faagaioia e faiga faatekonosi e pei o mea e ta'ua o 'foliga taufaasee' faapea ai ma le faaoga o masini ma tekonoosi faa-atamai
- siitia ai lamatiaga ma taunuuga e afua mai i le faasalalau ma le mautinoa o faamatalaga sese e atili faatupu ai fevaevaeaiga i le va o tagata ma aafia ai tagata (mo se faataitaiga, o le tau faamata'u, sauaga, faamata'u ma le faaosēsā i pulega tau tulafono, ofisa faasalalau, tomai suesue, sui tofia, ma le mamalu o le atunuu)
- o le faasalalauina ma le mautinoa o faamatalaga sese e tosina ma faateleina ai le tele o aafiaga ma luitau i le malupuipuia o le atunuu.

Sauniuni nei mo le lumanai:

- **Galulue soosoo tauau** - e moomia taumafaiga sili atu le malosia e mafai ai ona iloa faiga o faalauiloa ai le faasalalau ma le mautinoa o faamatalaga sese ma fesootaiga o lagolagoina faiga nei, ma faaoga faiga faavaomalo maopopo e faalavelave ai, faatasi ai ma le faasa'o o i latou o lagolagoina nei ituaiga faiga. E tatau ona aofia i taumafaiga nei le galulue faatasi ma le toatele o tagata eseese, ofisa faasalalau, tomai suesue, matagaluega a le malo ma faalapotopotoga tumaoti - aemaise kamupani tau fesootaiga televavave - ina ia malamalama i aafiaga o faiga

faamatematika o latou faaaogaina e faatosina atu ai tagata i mea o faasalalau i luga o le initaneti. E tumau pea le avea ai o le faasoā o faamatalaga aogā ma isi atunuu o se vaega o taumafaiga e tali atu ai.

- O faiga ua faia i Niu Sila e atiae ai le vave faafoisia o le malosī o le atunuu ma taofia le faasalalau ma le mautinoa o faamatalaga sese o tulaga nei e moomia ona anoa ma umi se vaitaimi e aogā ai. E tatau ona faatasia uma ai tagata e maua ai le tele o metotia ma le tomā, a o faatumauiina le puipui o aiatatau faaletagata ma le saolotoga e faaali manatu, ma le leai o ni noataga, toe saoloto le faaaoga o le initaneti i auala e le afaina ai.

Soli faagaoi ma osofaiga faatekonolosi

O le soli faagaoi ma osofaiga faainitaneti e faavae i luga o le sailia o tupe, ma o ni uiga faafitafita po o le faa-agaaga, po o le naunau foi e faalauiloa se lagona po o se talitonuga. E tele ai tupe gau, tauleagaina ai, ave faagaoi o meatotino ma le faalavelavea o auaunaga tetele e pei o faletupe ma auaunaga faalesoifua maloloina.

O osofaiga faainitaneti o se faaletonu o afaina ai tuluiga uma o le atu laulau ma e aafia ai malo uma, auā e mafai ona faalavelavea ai auaunaga tetele ma e afaina ai le soifua ma le ola o le tagata. E faalagolago le gafatia ona tatou tali atu i osofaiga faainitaneti i le faamaopoopo mai o isi atunuu e tau faailoa vaifōfō ma talia faatasi amioga faaalua ma faiga e 'tonu ma tatau' ai.

Ua taatele osofaiga faainitaneti i Niu Sila

O osofaiga faainitaneti maoae na osofaia ai pisinisi tetele na aafia ai:

- le osofaiga o le NZX (New Zealand's stock exchange) na matuai lofituina ai le faalapotopotoga i feoaga faainitaneti e taofi le maua e tagata o auaunaga o faatautaia i luga o le initaneti
- solia o faiga o teu ai faamaumauga a le Reserve Bank of New Zealand ona ua faalēaogāina le malosi o le IT o teu malupuipua ai faamaumauga
- e \$30 miliona le telē o le soli faagaoi o le initaneti na osofaia ai feuaiga o le cryptocurrency a le Cryptopia e fafoe mai Kalaiasetete, ma
- le togiola o osofaiga na maua ai faamaumauga a le Waikato District Health Board.

E iai lo matou talitonuga o le isi 10 i le 15 tausaga o sosoo ai, o le a faatuputupulaia osofaiga faainitaneti ogaoga ma le maoae. E aafia leaga ai Niu Sila i osofaiga faainitaneti o tutupu i atunuu mamao. I totonu lava o Niu Sila, na faaalua e le 81 pasene o tagata na tali mai i le National Security Public Survey le avea ai o osofaiga faainitaneti ma popolega - e maua atu i le faatusatusaga masani i le atu laulau (75 pasene). Na ioeina lea manatu e i latou na tali mai i le mataupu na faatalanoaina, na latou ta'ua ai e lē masani ona maua e tagata taitoatasi mea e faatumauina ai le saogalemu i luga o le initaneti.



O SE TULAGA LEA O LOO VAAIA I TAIMI UMA. E TUSA MA GALUEGA O MATOU FAATINO A E TATAU

LAVA NA MATOU MULIMULITAI I MAU TULAFONO E TAUMAFAI E TAOFIA OSOFAIGA FAAPENEI, MA NA O NAI VAEGA ITI NA AOGĀ I AI.” MANATU FAAALIA SUI AUAI O LE SUESUEGA

E toatele tagata na faailoa mai ia i matou le moomia o le tuu atoa o taumafaiga tutusa e malupuipua ai faiga i luga o le initaneti e pei ona faia i le itu faaletino, aemaise mo vaega e itiiti le iloa o faiga faainitaneti ma i latou e lamatia gofie ona o isi mafuaaga.

O le vaitaimi mai le 2020/21, na faamauina ai e le **National Cyber Security Centre** (NCSC), o se vaega o le Government Communications Security Bureau, le 404 o osofaiga faasaga i faalapopotoga tetele o le atunuu - ma e 15 pasene e maualuga atu ai faatusa i le tausaga ua mavae atu. Mai mea na tutupu, e 27 pasene na faasino i soligatulafono na masalomia po o tagata na sue aupito ai a latou tupe (e faatusa i le 14 pasene o le tausaga ua mavae atu). Na faia e le NCSC se faatusatusaga e fua i ai taumafaiga na latou taofia ai le \$199 miliona o le tau o lamatiaga.⁶ O lipoti na saunia e le **CERT NZ** o faailoa ai mo tagata taitoatasi ma isi pisinisi e tusa ma le 13 pasene i le 2021 na siitia ai tulaga faapenei na tutupu ma e \$16.8 miliona na faaoga ai.⁷

O manatu tusia mai matātā i le mataupu na faatalanoaina na faasino i le sese o le faatusatusaga i le va o le siitia o faiga faamata’u mai osofaiga faainitaneti ma atinae faafaigaluega a faalapopotoga i le malupuipua o le initaneti, ma le feteenai o manatu i le matagaluega e tatau na fitoitonu ma le malupuipua o le initaneti. E lē o maua i le Malo metotia e tausia ai le malupuipua o Niu Sila. E moomia e pisinisi ma tagata taitoatasi ona nofouta i le aogā o puipuiga ma ia mataala ia latou lava puipuiga e tetee atu ai osofaiga faainitaneti.

Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:

- o le faatuputupulaia o le lavelave ma le faifai soo o soligatulafono faainitaneti e luitauina ai lo tatou gafatia faatasi ona tali atu
- o le faateteleina o osofaiga faainitaneti o lamalama ai tekonoosi aogā mo pisinisi, e aofia ai maketi e gaosia oloa
- o tekonoosi foufou ma le fesuisuia’i o le faaogaina o tekonoosi nei e avea ai ma auala fou e faatautaia ai osofaiga faainitaneti ma soligatulafono e uunaia i faiga faainitaneti
- o le faatoateleina o atunuu e lagolagoina faiga faainitaneti, ma le nenefu po o ai tonu le atunuu a o ai tagata faatiga loto tutoatasi ma le maualuga o lo latou tomai
- o le siitia o faiga o faia ai feafaatauaiga faapouliuli mo le faatauina mai ma faatauina atu o polokalame faakomepiuta leaga ma faamatalaga, ma ua mafai ai ona faia osofaiga faainitaneti i totonu o le li’o o tagata e lē patino i ai ni tomai faapitoa
- o le siitia o le faaogaina o cryptocurrencies e auala atu i faiga faavae e lē malosia o faatonutonu ai feuaiga faananā o tupe o se vaega o osofaiga faainitaneti, ma le
- siitia o le faaoga o osofaiga faainitaneti e lagolago ai isi gaioga e aafia ai le malupuipua o le atunuu e pei o le faasalalau ma le mautinoa o faamatalaga sese ma faamatalaga sese, o le alalai mai o atunuu ese ma soligatulafono maopoopo i le va o atunuu.

Sauniuni nei mo le lumanai:

- **Collaboration - New Zealand's Cyber Security Strategy 2019** o saunia ai se auivi o galuega faatino e taimua ai le malo, ma e galulue faapaaga ai ma matātā tumaoti. E lagolagoina e le NCSC faalapotopotoga tetele o le atunuu e puipuia upega fesootai, ma galulue e saunia fautuaga e mafai ai ona taofiofi, poloka, iloa, ma faalavelave, i gaoiga faainitaneti leaga e ono aafia ai le malupuipua o le atunuu po o le manuia o le tamaoaiga. O le avea ai o osofaiga faainitaneti o se vaega o soligatulafono maopoopo ma e faaautu tonu lava i le sailia o tupe, o le auga tonu lena o loo taulimaina e le Transnational Organised Crime Strategy faasaga i faalapotopotoga o solia tulafono ma le feaveai faananā o tupe o loo faalagolago i ai le maua o tupe mama e lē tusa ai ma le tulafono, e aofia ai tagata o osofaia le initaneti.
- **Faamatalaga lautele ma talatalaga** - o le NCSC, CERT NZ, NZ Police, ma le Netsafe e tuuina atu i ai ma faasoaina mai ai lipoti ma lapataiga.
- **Talatalaga faavaomalo** - e aofia ai le tuuina atu o le pule malosi i le *'Budapest Convention'* on Cybercrime, ma le faamoemoe e faamalosia atili faamaopoopoga faavaomalo e tali atu i soligatulafono faainitaneti, ma talatalaga ma paaga vavalalata o Malo Afaatasi ma isi ina ia poloka ma faalavelavea gaoiga leaga faainitaneti. E iloa ai e masani ona fesootai faiga faamata'u faainitaneti i faaletonu i le tuaoi o atunuu ma e moomia ai vaifōfō faavaomalo. E galulue vavalalata foi le NCSC ma paaga faavaomalo e atiae se puipuiga mauaa o faiga faainitaneti.
- **E galulue pulega o faamalosia tulafono ma faamaopoopo faamatalaga** - ma paaga faavaomalo, e aofia ai le faasoaina atu o faamatalaga ma le tomai e taofia ai osofaiga faainitaneti i isi atunuu. O loo sailia foi e leoleo avanoa e galulue faapaaga ai ma pulega o faamalosia tulafono i atunuu mamao e aveese mai aseta mai tagata o faia soligatulafono faainitaneti.

Soligatulafono maopoopo faavaomalo

O soligatulafono maopoopo i le va o atunuu o se faafitauli ua soo ai le atu laulau ma e faaleaogāina ai le soifua manuia o tagata, pulega, atinae tau tamaoiga ma le malupuipua o le atunuu. I se vaaiga aoao i le atu laulau atoa, o tupe maua mai soligatulafono maopoopo e tusa lea ma le USD\$3 tiliona (pe faatusa foi i le 4% o le GDP o le lalolagi atoa).⁸

E auala atu i gaioiga e solia ai le tulafono, le sailia e tagata solitulafono o soligatulafono maopoopo i le va o atunuu e maua ai le pule, faiga faatosina ma tupe e auala atu i le feaveai faananā o fualaa faasāina, o le soona faileaga o tagata fai mai ma le feaveai faananā o tagata, faiga taufaasese ma le piopio, ma soligatulafono faainitaneti. E faatitino a latou faiga i totonu o le atunuu ma tau auala atu i Niu Sila, ma afaina ai tagata ma pisinisi, ma aafia ai le faatuatuaina e tagata o tatou pulega ma lo tatou tauleleia i atunuu ese.

“ NA FAASALALAU I TALAFOU FAATUATUAINA I TAUSAGA UA MAVAE OSOFAIGA TETELE NA MAUA AI FUALAAU FAASĀINA, AUUPEGA MALOLOSI FAASĀINA I LE TULAFONO MA ISI. O SE FAAILOGA MAUTINOA LEA O LOO OLA MA SASAO SOLIGATULAFONO MAOPOOPO O AOFIA AI TAGATA FAAVAOMALO FAAPEA AI MA NIU SILA I LE TAIMI NEI, MA E LĒ TAU MATE LE TOE ALIAE O TULAGA FAAPENEI I LE ISI 12 MASINA O SOSOO AI.”
MANATU FAAALIA SUI AUAI O LE SUESUEGA

E iai lo matou talitonuga o loo uunaia soligatulafono maopoopo mai le siitia o sootaga maoae ma le maopoopo ma le sasao o faiga nei i le va o atunuu. E tau auala atu fesootaiga i faiga faavae i le tuaoi ma fefaatauaiga, tupe, kamupani e umia aseta ma kamupani tausii mavaega o faafaigofie ai ona feaveai faananā tupe, ma manaoga ma le gaosia o oloa ma auaunaga e lē tusa ai ma le tulafono i le va o atunuu, e ono tupu ma ola ai soligatulafono maopoopo i le va o atunuu mai totonu o lo tatou lava atunuu.

E mafai ai ona aafia le faatuatuaga ma le talitonuga mautinoa o Tagatanuu Niu Sila i tatou pulega lautele ma faiga faavae e tali atu ai. Na ta’ua e le valusefulu pasene o tagata na tali mai i le

National Security Public Survey le moni o faiga faamata'u mai soligatulafono maopoopo i le isi 12 masina o sosoo ai, ma le 78 pasene na ta'ua le faaauau pea o faiga faamata'u mo le isi 10 tausaga o sosoo ai.

E faaoga e taitai o pulea vaega o faia soligatulafono maopoopo i le va o atunuu mailei ma faiga faamata'u e pulea ai soligatulafono ma puipuia ai fefaatauaiga e faasā i le tulafono. E iai le manatu e talafeagai sauaga e pulea ai faiga nei. O le faia o sauaga faapei o se auunaga e mafai na maua ai tupe e tagata ua atamamai i soligatulafono ma/po o le faia faatasi ai ma fualaa faasāina, ua tatou vaaia ai le faatitino o sauaga i le tino ma auupega malolosi e puleaina gaioiga e solia ai le tulafono. O le tele o manatu na faaalua mai e le mamalu o le atunuu o loo faamamafa ai aafiaga lautele o soligatulafono maopoopo i le va o atunuu, ma atugaluga autu i sauaga e fesootai ma vaega fai kegi ma le tufatufaina o fualaa faasāina i totonu o lotoifale ma afioaga.

Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:

- siitia o le soona fai o fefaatauaiga e lē tusa ai ma le tulafono i soo se auala e maua ai tupe mama - mai fualaa faasāina, auupega malolosi e faasāina i le tulafono, soligatulafono faainitaneti ma metotia tau tekonoosi foufou, meaola faalafuā ma punaoa faalenatura, feoaiga ma galuega e lē tusa ai ma le tulafono, o le aumai atunuu mamao o oloa i auala e solia ai le tulafono, faiga taufaasese maopoopo ma faiga faapiopio. E iai lo matou talitonuga o le a taumafai vaega o faia soligatulafono maopoopo i le va o atunuu e faafetaui ma suia a latou metotia e maua ai tupe mai lamatiaga o afaina ai isi
- siitia o soligatulafono e maua ai fualaa faasāina aemaise le afaina ai o tagata e lē tagolima i Niu Sila, talu ai o loo lamalama e faalapotopotoga o solia tulafono tagata na afaina i soligatulafono ae o ituaiga tagata lava nei e avea ma o latou soātau e faatinoā soligatulafono⁹
- siitia o faiga maoae i le feaveai faananā o tupe, e aofia ai kamupani e pulea aseta ma kamupani tausī mavaega i le lalolagi atoa, ma le tau auala atu i tinoitupe ma cryptocurrencies. O le lē faatonutonuina o fefaatauaiga tau tinoitupe i Niu Sila o le isi lea auala o sasao ai le feaveai faananā o tupe. E vave lava ona latou faaogaina tulaga o loo misi i le tulafono. E sao tupe maua mai soligatulafono i faiga faapisinisi, fale ma oloa anagatā, ma e afaina tele ai tagata o fia faatauina mai fale ma faafoeina pisinisi
- o le faatupu vevesi o soligatulafono maopoopo i faiga o puleaina ai tuaoi o Niu Sila
- o le siitia o taumafaiga a vaega o faia soligatulafono maopoopo i le va o atunuu e tosina, sao atu ai i totonu, faaleaga po o le faamailei o tagata taitoatasi ma auunaga lautele e faalauaitelina ai gaioiga soligatulafono ma gaioiga e faamata'uina ai le malupuipuia o le atunuu. O faiga nei e afaina ai le faatuatuaga ma le talitonuga mautinoā o tagata lautele ia tatou faalapotopotoga ma le tauleleia o Niu Sila o se atunuu e itiiti faiga faapiopio o maua ai ma le maualalo o aafiaga i lona tulaga faapaaga tau fefaatauaiga ma isi atunuu.

O nisi o galuega o matou faatinoina i le taimi nei

- **Feaveai faananā o tupe ma le aveese mai o aseta** - o le faasoā o faamatalaga aogā, galulue ma paaga mai isi atunuu e taofia, poloka, ma faalavelave i soligatulafono maopoopo.
- **Faiga faapaaga ma matagaluega, ma isi atunuu e taofia faiga faamata‘u o faia i isi atunuu** - faatino galuega i totonu o atunuu mamao, e aofia ai le faasoaina atu o faamatalaga ma tomā, e taofia faiga faamata‘u, aemaise fualaau faasāina ma tagata solitulafono ona ulufale mai i Niu Sila.
- **Faamalosia o le tulafono** - taumafaiga tuufaatasia a matagaluega e tali atu ai i soligatulafono maopoopo e aofia ai le polokalame na faatulafonoina e le Kapeneta o le Resilience to Organised Crime in Communities ma le Transnational Organised Crime Strategy.

Alalai mai o isi atunuu ma faiga faa-agaaga

Ua avea ma e faaauau pea le avea o Niu Sila ma atunuu e lamalama ma alalai mai ai isi atunuu ma faiga faa-agaaga.

E aofia ai taumafaiga a isi atunuu ina ia, mo se faataitaiga:

- taumafai e maua faamatalaga maaleale, tekonolosi po o tomai faapitoa (e pei o mea e patino ia tatou pisinisi, iunivesite ma matātā tau aoaoga)
- faaoga osofaiga faainitaneti e ave faagaai ai faamatalaga pe lamalama ai atinae tetele
- maitau, pulea po o le faamata'ū o tatou tagata, aemaise i latou e iai fesootaiga i atunuu mamao, ma afaina ai le aiatatau ma le saolotoga o tagata i totonu o Niu Sila
- punitia po o le faasalalau o faamatalaga (e aofia ai ma fesootaiga televavave) o atagia ai mea o latou aiaina, e aofia ai le faasalalau ma le mautinoa o faamatalaga sese.
- faatosina atu sui na tofia e tagata, vaega faaupufai, ma faiga palota, ma
- faamata'ū pe taumafai e faamalosia le pule aoao i Niu Sila po o le saolotoga e faia ai nisi o faaiuga (mo se faataitaiga, faamata'ū e faasā ona aumai i totonu o le atunuu po o lo tatou auina atu i isi atunuu o nisi o oloa pe a faapea e faatino se faiga e lē fetau ma a latou fuafuaga).

O loo faatuputupulaia le alalai o atunuu ese i isi atunuu, e pei ona molimauina i le atu laulau, ma e lē o saofia mai ai Niu Sila - ma ua faateteleina faataitaiga o faiga faapenei ua tatou vaaia.

Mai le lautele o le atunuu na tuuina mai manatu i le mataupu o faatalanoaina:

- e toatele lava na ta'ua le avea ai o le alalai mai o isi atunuu o se faiga e faamata'ū ai mea e patino i le tagata ma le atunuu aoao
- na faaalā e nisi se popolega i le tau sailia e atunuu ese o se fevaevaeaiga o ituaiga tupuaga eseese i Niu Sila (o se taumafaiga e aveesea ai le malosi o pulega tonu faavaomalo)
- o luga teisi atu o le vaetolu o manatu na ta'ua ai Saina, ma le alalai mai i tagata o nonofo i Niu Sila ma tulaga e ono faatosina ai faiga faaupufai, ofisa faasalalau ma pisinisi i Niu Sila, ma
- o nisi na ta'ua le moomia e Niu Sila le faaeseese o ituaiga maketi tau fefaatauaiga e alofia ai le faamalosia o le tamaoaiga i le lumanai.

Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:

- ua avea tekonolosi televavave fougou ua suia ai faiga ma auala o faatino e atunuu ese e alalai mai ai i lo tatou atunuu (ma atunuu tatou te tuaoi) ma atili faafaigata ai na tatou taofia le tutupu o tulaga faapenei
- ua faateteleina faiga faatautavā i le va o atunuu ma ua ‘nunumi’ i le tuaoi o feteenaiga ma le toafilemu (e aofia ai faiga o alalai mai ai isi atunuu). O le a telē atu se aafiaga o faiga faafitafita ma faiga faamalosi. O nisi atunuu o le a taumafai e faananā auala e faatino ai mea o faamoemoe i ai, a o taumafai e tūtū mamao e alo ese pe tau faaitiitia le fetuu e isi atunuu.

Sauniuni nei mo le lumanai:

- **Talatalaga Lautele** - siitia o le malamalama ma le tomai o faalapopotoga o fetaia’i ma aafiaga e mafua i le alalai mai o isi atunuu. O loo galulue le **malo** faatasi ma faalapopotoga tau suesuega ia latou iloa pulea aafiaga e fesootai ma tekonolosi e faigofie ona maua e isi, ma saunia taiala mo sui tofia ma isi matātā o fetaia’i ma nisi o aafiaga.
- **Faasoaina atu o faamatalaga ma metotia** - o loo matou faalauiloa faiga manino e iloa ai mea o aiaina e atunuu ese ma faaoga le **New Zealand’s Protective Security Requirements** e saunia ai e faalapopotoga se auivi e iloilo ma faamalosi atili ai faiga o malupuipua ai.
- **Tulafono** - o loo matou faamautinoaina o loo faia i Niu Sila taiala faavae ma tulafono e agatonu ma talafeagai ma mea o tutupu ina ia mafai ona faaitiitia pe taofia le alalai mai o isi atunuu ma faiga faa-agaaga. E aofia ai le Overseas Investment Act 2005, o le Telecommunications (Interception Capability and Security) Act 2013, o le auivi o puleaina fefaatauaiga o oloa i atunuu mamao faapea ma tulafono i le faatupega o faiga palota.

Faiga faaterorisi ma talitonuga matuiā

Na faamamafa i tali na faaalā e sui auai o le National Security Public Survey se popolega o tagata i suiga i faiga faaterorisi ma talitonuga matuiā i Niu Sila ma o le a atili faafaigata ai ona taofia i le lumanai. E iai le talitonuga i le valusefulu pasene o sui na auai i le suesuega i le moni o faiga faamata'u o se osofaiga faaterorisi po o sauaga matuiā i Niu Sila i le isi 10 tausaga o sosoo ai, ma le 23 pasene o talitonu e pito sili ai lava faiga faaterorisi e faamata'uina ai tagata.

I tuluiga uma o le atu laulau, e avea pea suiga ese o talitonuga matuiā ma faiga faamata'u, ma e faasufi i le malosi ma le lavelave o talitonuga (manatu) ma e faaauau pea le avea o faiga faaterorisi e afaina ai le saogalemu o tagata taitoatasi ma le lotogatasi o tagata uma. O mea o faaososoina ai talitonuga matuiā e aofia ai manatu e fevaevae'i ai se atunuu (ua matuai eseese manatu po o talitonuga), ua aliae ai se feeseeseaiga i le va o vaega faaupufai ma totonu lava o vaega faaupufai, ekalesia ma ituaiga tagatanuu, ma faiga faamata'u e moni ma ua talitonu e afaina ai nisi o ituaiga tagatanuu, aga tausili, pulega ma tulaga faaletagata.

Ua soona fai e tagata o faia talitonuga matuiā le saosasoa o le initaneti - ma ua faateteleina a latou gaiouga ona e lē o iloa tonu i latou nei i luga o le initaneti, o le faigofie na faaoga, o le puipuia o faamatalaga patino i faailoga e punitia ai, ma o se luitau lea mo malo, kamupani ma tagata lautele ia vave ona iloa suiga faatekonolosi. E faaoga e tagata o faia talitonuga matuiā le initaneti e faasufi atu ai tagata e faatino a latou gaiouga, faasoa ai le iloa, ma fuafua ma faasalalau ai osofaiga i luga o le initaneti, ma ua avea o latou manatu faasausili ua tele ai isi talitonuga ua aliae mai e aunoa pe itiiti foi se lapataiga e iloa ai.

Ko tō tātou kāinga tēnei - o le lipoti na saunia mai le Royal Commission of Inquiry i le osofaiga i le malumalu muselemi i Kalaietete - o faamamafa ai luitau o galuega e vaavaai ma faafetaui ai manatu faasausili i luga o le initaneti, ma ua toe faamaonia ai le moomia e matagaluega tau tomā ma puipuiga le maua o le tofa loloto, metotia ma punaoa e lagolagoina taumafaiga e faafetaui ai faiga faaterorisi. O le telē o nei taumafaiga e faalagolago i le sa'o o faamatalaga o maua i le taimi tonu o moomia ai.

Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:

- o le faateteleina o le salalau o manatu faatupu inoino ma le lē faautauta i luga o le initaneti, aemaise faamatalaga faatupu inoino ma le faaoga o mea e faaali ai manatu faasausili, ma o mea nei e faaosofia ai le faateteleina o faiga faamata'u faaterorisi ma talitonuga matuiā
- faateteleina o talitonuga faasausili i tuluiga o le atu laulau, ma ua aliae ai ma nisi o manatu na fafau mai manatu faasausili nei.

Sauniuni nei mo le lumanai:

O le sini autu o le ***New Zealand’s Countering Terrorism and Violent Extremism Strategy*** o le faamaopopo o lo tatou atunuu e puipui i Tagatanuu Niu Sila mai faiga faaterorisi ma ituaiga talitonuga matuiā uma. E fa poutu autu o le taiala faataatia lenei, ma e faatasi ai ma galuega e aofia ai le:

- **Mōhio, malamalama** - faavaeina le ***He Whenua Taurikura***, o le National Centre of Research Excellence for Preventing and Countering Violent Extremism. E tumaoti ma e patino i Niu Sila suesuega latou te faia e iloa ai mafuaaga, ma auala o taofia ai, faiga faaterorisi ma talitonuga matuiā.
- **Mahi tahi, galulue faatasi** - o le fonotaga faaletausaga He Whenua Taurikura i le taofiaina ma le faafetaui o talitonuga matuiā ma e saunia ai se vaaiga autu mo le galulue faatasi o se atunuu e tasi e tuuitiitia lamatiaga.
- **Whakahōtaetae, taofia** - o loo faia galuega e atiae ai se ***Auivi o Taiala Faataatia e taofia ma tetee ai talitonuga matuiā ma manatu faasausili i Aotearoa Niu Sila***. O loo faia nei galuega e taofia ai ma e aofia ai le He Aranga Ake, e tele matagaluega o galulue faatasi i le faatinoga o se polokalame e vave ona taofia ai faiga faapenei ma fesoasoani i tagata taitoatasi o faaaliamioaga faatupu vevesi. Talu ai nei na faasalalau ai le taiala, ***Kia mataara ki ngā tohu - Know the signs***, e mafai ai e Tagatanuu Niu Sila na iloa foliga o talitonuga matuiā.
- **Takatū, nofo sauni e vave tali atu ma toe faalelei** - o lo o matou galulue faapaaga e lagolago tagata ua afaina i osofaiga, faapea ai ma le faamautinoa o lo o agatonu ma talafeagai tulafono e tetee atu ai i faiga faaterorisi, auupega malolosi, feaveai faananā o tupe ma tetee atu i faiga o faatupeina faiga faaterorisi. O Niu Sila, faatasi ai ma Farani, o lo o taimua i le faatinoga i le atu laulau o le Christchurch Call to Action e faamaopopo ai faigamalo e 120 ma ona tupu, auauunaga faainitaneti ma faalapotopotoga faitetele e faatama'ia faiga faaterorisi ma talitonuga matuiā o faasalalau i luga o le initaneti. O le tasi o vaega o ave i ai le faamuamua o le Christchurch Call Community o le malamalama atili i metotia faatekonolosi, ma le fesootaiga o metotia faatekonolosi ma tagata o faaaogaina faiga faapenei, e aafia ai mataupu faaterorisi ma talitonuga matuiā ma uiga faasausili i luga o le initaneti. E tāua le malamalama i mea o faamoemoe i ai metotia faatekonolosi auā le tau atinaega o faiga e faalavelavea ma faatelevave ai suesuega mo le sailia o metotia e tali atu ai.

Luitau o le vave faafoisia o le malosi i atumotu Pasifika.

O le taatiaga o la tatou laufanua i le atu laulau, o le vavalalata o sootaga o tagata, ma le tuufaatasia o tatou faiga faavae (e pei o tausiga faalesoifua maloloina), o lona uiga e lē mafai ona lē afaina Niu Sila i mea o tutupu i Atumotu o le Pasifika. O le toafilemu, mautū, lausiusi ma le vave faafoisia o le malosi i le Pasifika o vaega nei e tāua i le malupuipua o Niu Sila. Ae o loo fetaia'i le itulagi o tatou iai ma le tele o luitau e fesootai ma e afaina tele ai le malupuipua o le atunuu.

E tumau pea le avea o suiga o le tau ma faiga faamata'u silisili i le soifuaga, puipuiga ma le soifua manuia o tagata Pasifika, ma le faateteleina o aafiaga o le siisii o le gataifale, o le matautia o tau, o le utiuti o suavai faalenatura e aogā i le taumafa ma le faatuputupulaia o le moomia o meaai. O se faaletonu o feagai ai nei ma nisi o atumotu o le Pasifika, ma e avea foi suiga o le tau e atili faateteleina ai luitau tau agafesootai, tamaoaiga ma puipuiga.

E avea pea faiga faamata'u i tuaoi o atunuu e tofotofoina le vave faafoisia o le malosi o tagata Pasifika, e aofia ai ae e lē faatapulaaina i ai: soligatulafono maopopo i le va o atunuu; soligatulafono tau le siosiomaga e pei o le solia o tulafono i le tātuuina o laau, o le faaleagaina o gataifale ma faiga faiva o solia ai tulafono, e lē o lipotia ma e lē o faatonutonuina; o faiga faamata'u e afaina ai le ola ma le soifua o tagata e pei o faamai e pepesi gofie ma manu faalafuā; ma faiga fou e pei o soligatulafono faainitaneti, alalai mai o isi atunuu ma le faasalalau ma le mautinoa o faamatalaga sese ma faamatalaga sese.

Na faaalua foi e sui na auai i le National Security Public Survey le mou ese o le malosi o Niu Sila i le Pasifika, ma e iai lo latou talitonuga o le a faateteleina le avea ai o le tulaga lea ma luitau i le isi 10 i le 15 tausaga o sosoo ai:

- e 57 pasene na latou ta'ua le moni o faiga faamata'u o isi atunuu (faho atu o le Pasifika) ua lamatia ai le aiaina e Niu Sila o mataupu i totonu o le Pasifika i le isi 12 masina o sosoo ai
- e 61 pasene e talitonu i le avea o faiga faamata'u mai isi atunuu i totonu o le Pasifika o se popolega i le isi 10 tausaga o sosoo ai. E sili atu ona taatele manatu nei i tagata Asia ma tagata Pasifika na tali mai i le suesuega.

O loo tatou vaaia le faateteleina o faiga faatautavā i totonu o le Pasifika, ma e mafua tele i le faatuputupulaia o le malosi o Saina. O faiga faatautavā nei o le a vaaia i le lumanai ma o le a faateteleina ona afaina ai le malupuipua ma le pule aoao tutoatasi o lo tatou itulagi ma atumotu o

le Pasifika. E ui i le faatumauiina o le malupuipua o Niu Sila mai le toafilemu ma le mautū o le itulagi i le tele o tausaga ua mavae, ua faailoa mai e isi i fafo atu o le itulagi le fia faalauaitelina o a latou faiga tau puipuga ma o se tulaga o le a atili faatautavā ai faiga e malupuipua ai. E avea lea ma mea e afaina ai faiga faavae ua leva ona faataatia na aogā mo lo tatou itulagi.

Mo se faataitaiga, i le 2019, na faasilasila ai e Saina se faamoemoe e faatuputeleina ana faiga faamiliteri i totonu o le Pasifika, ia faatutusa ma sini o faamoemoe i ai i tulaga tau pulega, fefaatauaiga ma le tamaoaiga.¹⁰ E tele isi atunuu o loo tau saili foi auala e siitia ai a latou sootaga ma meafai i totonu o le Pasifika ma e avea le siitia o faiga nei e atili lavelave ma faatuputeleina ai faiga faatautavā.

Mai le isi 10 faasolo atu i le 15 tausaga o sosoo ai, o tulaga nei matou te talitonu o le a tulai mai:


- o le atili faateteleina o faiga faatautavā tau fefaatauaiga e avea lea ma luitau i faavae ua faia nei e malupuipua ai itulagi o le Pasifika
- faateteleina o le lavelave o luitau ma le maoae o faiga o soli ai tuaoi i le va o atunuu ma luitau tau puipuga tumaoti, e pei o soligatulafono maopoopo i le va o atunuu
- o le faatupulaia o manaoga e malupuipua ai le ola ma le soifua o tagata, e aofia ai meaa i ma le suavai
- o mea o tutupu ma faalavelave ona o suiga o le tau ua aafia ai le tele o atunuu i le taimi lava e tasi ma e moomia ai le faafaigaluega o le tele o atinae e mafai ai e tagata Pasifika ona vave faafoisia lo latou malosi ma gafatia ona tali atu.

Sauniuni nei mo le lumanai:

- E atagia i talatalaga o faia pea i totonu o le Pasifika le loloto o sootaga ma le itulagi ma ona tagata ma e uunaia i luga o se lagona e fia maua le toafilemu, ola lausiusi ma le vave faafoisia o le malosi i atumotu tuaoi.
- E faamalosi atili mai le Aotearoa New Zealand's Pacific Resilience Policy le avea ai o le Pasifika ma fatu o la tatou faasinomaga ma manatu lautele, ma e talia le avea o auala pito faatuatuaina tatou te tali atu ai i le lavelave o luitau e pei o faiga maopoopo atoatoa, ma le galulue faapaaga vavalalata ma isi atumotu o le Pasifika, e faatupu ai le vave faafoisia o le malosi mo se vaitaimi mamao.
- O le taliaina o le tele o vala e tau auala mai ai aafiaga i le malupuipua o le atunuu e aafia ai agafesootai, faiga faaupufai, tamaoaiga ma le siosiomaga, ma o lea ua matou folafola ai le tuuina atu o le \$1.8 piliona i le atinaega o polokalame e lagolagoina atumotu o le Pasifika mai le 2021 seia aulia le 2024 i vaega e pei o aoaoga, soifua maloloina, tamaoaiga tutoatasi, aiatatau faaletagata ma atinae e faaofia uma ai tagata, pulega ma faiga faatemokarasi, atinae tetele, ma le tele o isi taumafaiga.
- Ua loa tausaga o le lagolagosua ua tatou faia e faatupu ai faiga e malupuipua ai atumotu o le Pasifika, mo se faataitaiga, o puipuga a ofisa o leoleo, ofisa o tiute, femalagaiga ma le

malupuipua o faiga faainitaneti. O galuega faapaaga vavalalata ma isi, aemaise Ausetalia, ua mafai ai foi e Aotearoa Niu Sila ona tuuina sa’o atu i le itulagi galuega tau puipuiga ma faiga e malupuipua ai, e aofia ai gaioiga tau puipuiga e pei o leoleoga o faiga faiva, ma le tali atu i taimi o faalavelave faafuasei - mo se faataitaiga i le uma ai o se mala faalenatura.

- Tatou te lagolagoina malosi foi i latou o taimua i taumafaiga e mafai ai e le Pasifika ona tali atu i faafitauli o le Pasifika lava, ma e tele faalapotopotoga i le itulagi o loo tatou fesoasoani i ai e pei o le Forum Fisheries Agency, o le Pacific Transnational Crime Coordination Centre, o le Pacific Islands Chiefs of Police, ma isi.
- E tutusa lava le faatāua o faiga o galulue faatasi ai Aotearoa Niu Sila ma le Pasifika e pei lava ona faatāua i galuega o tatou faatinoina. E avea le faamamalu o aga taualoa e pei o le whanaungatanga (faiā ma sootaga), kotahitanga (loto gatasi) ma le kaitiakitanga (tausimea) faapea ai ma le amanaiaina o le mamalu o tagata Pasifika ma tulaga e faamalositia atili ai a tatou faiga faapaaga.



Malupuipuia o Aotearoa Niu Sila i le isi 10 - 15 tausaga

**O LE VAEGA LEA O LE A TATOU
TILOILO AI I NISI O MANAOGA
AUTU FAATAUTAVĀ MA FILIFILIGA
O FETAIA'I MA I TATOU**

Malupuipua o Aotearoa Niu Sila i le isi 10 - 15 tausaga

O le vaega lenei o le a tatou:

- tilotilo i nisi o manaoga autu faatautavā ma filifiliga o fetaia'i ma i tatou
- mafaufau i mea ua manatu le mamalu o le atunuu e tataua ona matou faatinoa (e auala atu i le mataupu o faatalatalanoaina i le, National Security Public Survey ma manatu o matātā lautele o faatinoa faiga e malupuipua ai le atunuu) ina ia faasili le lelei o fesootaiga ma tagata, ma
- folasia nisi o manatu e tusa ma se taatiaga o foliga o le malupuipua o le atunuu i le lumanai, ma faiga e mafai ai ona tatou suia auala o tatou faasoa atu ai ma tagata eseese i Niu Sila ma ia tino mai manatu nei i se vaietimi mamao.

O loo faatuputupulaia aafiaga i le malupuipua o Niu Sila, faapena ai ma le lavelave ma le fesootai o aafiaga uma. E faalagolago le tino mai o faiga pito sili ona aogā tatou te tali atu ai i le faafofia o Tagatanuu Niu Sila i fesootaiga ma talatalaga o fia faia.

Matou te iloa lelei foi e lē mafai e matagaluega a le malo ona faataunuu le tele o galuega e tali atu ai i aafiaga o le malupuipua o le atunuu ma e tusa ai ma le tau atiaeina o le faatalanoaga lenei, e fia iloa sou manatu i foliga o le malupuipua o le atunuu i le isi 10 i le 15 tausaga.

O manaoga autu faatautavā ma filifiliga o fetaia'i ma i tatou

O le tele o manaoga ma filifiliga fai o fetaia'i ma i tatou e avea lea ma faalavelave ia tatou taumafaiga e faataunuu le maua o se lumanai manuia mo le malupuipua o Niu Sila. O le gasologa o le soifuaga i le lumanai e moomia ai e Tagatanuu Niu Sila ona faapaleni ma faamuamua manaoga ma filifiliga fai, ma le mautinoa e mafai ona suia manaoga ma faamoemoega o tagata.

Mo se faataitaiga, e moomia ona tatou faapaleni ma faamuamua le va o mea nei:

- tulaga patino e lē faalauaitelina, malupuipua ma le faatuatua

- mea o moomia ma manaoga o tagata taitoatasi ma tagata uma
- saoloto le faaali o manatu ma faatoilalo faaupuga faatupu inoino, talitonuga matuiā ma le faasalalau ma le mautinoa o faamatalaga sese
- faamautinoaina o le aogā o tomā ma galuega tau puipuiga e tatau na faatino e aunoa ma le soona faalauaitelaina, a o tau saili manatu ma faasoa atu faamatalaga ma le mamalu o le atunuu
- faafaigaluega galuega e tali atu ai i faalavelave o tutupu i le taimi nei ma siitia le malamalama ma le tomā e tali atu ai i luitau o agai mai, e aofia ai le nofo sauniuni mo aafiaga tetele ma e seāseā tutupu, ma le
- eseese o manaoga mo fesoasoani tupe a le malo, e aofia ai ma le eseese o tulaga o faamoemoe i ai le mamalu o le atunuu i mea o faafaigaluegaina ai tupe auā le malupuipua o le atunuu. O vaega tonu o faamoemoe atu i ai ma tulaga tau lagolagosua o manatu i ai le mamalu o le atunuu, o mea nei e ono lē atagia mai ai le faatuputupulaia o aafiaga ma luitau i le malupuipua o le atunuu.

E moomia lo tatou talanoa i le malupuipua o le atunuu

O mea na tutupu i tausaga ua mavae atu nei, e pei o le taua i Europa, o le sasao o le faamai i le lalolagi, o tagata faatiga loto o lamalama ia Niu Sila, ma le fesiitai o suiga i pulega tonu i le atu laulau, o mea nei e faateteleina ai se popolega ia i matou i le malupuipua o la tatou atunuu.


E le o lilo ia i matou o se popolega foi lea i Tagatanuu Niu Sila ma e fia iloa e tagata le tele o mea o tutupu, o isi e fia auai atili i auala o tatou tali atu ai - ma lo latou talitonuga e tatau ona tatou vave tali atu e tusa ma aoaoga na maua mai mea na tatou afaina ai ma suiga i faiga faamata'u ua molimauina i le lalolagi atoa.

Mai le National Security Public Survey:


- o le toatele o sui na auai i le suesuega (58 pasene) na fia iloa atili faiga faamata'u e afaina ai le malupuipua o Niu Sila, luitau ma avanoa
- o le 39 pasene na faaali le fia faailoa o manatu po o le auai i faatalatalanoaga lautele i le malupuipua o le atunuu, ma le
- 25 pasene na iloa nofoaga e maua ai nisi faamatalaga i le malupuipua o Niu Sila, ae na o le toatasi mai le toalima na manatu o loo tele le mau faamatalaga o faasoa mai e matātā o faatino le malupuipua o le atunuu.

“ E TATAU ONA TATOU TAUMAFAI E FESOOTALI I TAIMI UMA MA TAGATANUU NIU SILA E UIGA I FAIGA FAAMATA'U I LE MALUPUIPUA O NIU SILA, AEMAISE LAVA I TAGATA E PITO SILI ONA AAFIA MAI FAIGA FAAMATA'U I LE MALUPUIPUA O LE ATUNUU.” MANATU FAAALIA SUI AUAI O LE SUESUEGA


I le taimi nei o loo tele le mau faamatalaga o faasoa mai e matātā o faatinoa galuega i le malupuipua o Niu Sila



A e mafaufau i faiga faamata'ua uma ua matou folasia atu, e te talia pe teena faamatalaga taitasi o ta'ua i lalo?



National Security Public Survey: Information Channels used and Preferred Channel for Information on threats



E toatele tagata na faailoa mai e lē o faailoa mea e tatau i le mamalu o le atunuu na silafia ma e faigata ona maua e tusa ma galuega o faia e matātā o faatinoa le malupuipua o Niu Sila. Na latou fia iloa atili faiga faamata’u e sili ona avea ma popolega ia i latou. Na ta’ua foi e sui auai o le suesuega e sili ai le tuuina atu o faamatalaga i faiga faamata’u i le malupuipua o le atunuu e auala atu i nusipepa i luga o le initaneti ma le TV e matamata fua ai polokalame.

Na faaalua foi e tagata na faaoo mai manatu ma i latou na auai i le suesuega:

- faiga o faafaigata ai ona maua faamatalaga. E aofia ai le itiiti o faamatalaga o faamatalaina ai faiga faamata’u i le malupuipua o le atunuu, o mafuaaga na talafeagai ai faiga faamata’u ma auala o faia i Niu Sila e tali atu ai
- na ta’ua foi le lavelave o le tele o le mau matagaluega o aafia i galuega auā le malupuipua o le atunuu, ma
- ta’ua ai e iai nisi o tagata o lagona le palaai e fesootai ma matātā o faatinoa galuega i le malupuipua o le atunuu ona o tulaga na feagai ai ma i latou.

Na apoapoi foi i faiga e maua gofie ai matātā o faatinoa galuega auā le malupuipua o le atunuu e auala atu i le:

- saunia polokalame anoa mo tagata e faigata na maua auunaga (e fesoasoani ma uunaia tagata e auai i taumafaiga e puipui i le malupuipua o Niu Sila)
- saunia ma faasalalau se taiala faataatia mo talatalaga, ma
- saunia se faafanua o galuega faatino e limataitaiina le atinaega o faiga faapaaga ma le mamalu o le atunuu i le malupuipua o le atunuu.

Eseese o talitonuga mautinoa i le gafatia e matagaluega a le malo ona tali atu

Na faailoa mai i le National Security Public Survey le eseese o talitonuga mautinoa o Tagatanuu Niu Sila i tulaga e gafatia ai e matagaluega a le malo ona puipui i tatou e tusa ma le ituaiga faiga faamata'u.

Ina ua fesiligia pe faapefea i matagaluega a le malo ona atiae le talitonuga mautinoa o le mamalu o le atunuu, na faamamafa ai e sui na auai i le suesuega le moomia e matagaluega ona:

- vave tali mai
- nofo sauni, ma
- toaga e siitia le iloa ma malamalama o tagata lautele.

O ā foliga o se lumanai manaia mo le malupuipua o le atunuu?

E sefulu vaega autu ua matou manatu e mafai ona lagolagoina se lumanai sili ona manuia mo le malupuipua o Niu Sila i le isi 10 i le 15 tausaga o sosoo ai. E fesoasoani ia lelei atili ai a tatou tapenaga ma le tali atu i aafiaga ma luitau o folasia i le ootoga leni. E puupuu lava le faamatalaina o le siisii o le gataifale, ma o vaega nei e ono toe faia i ai isi saililiga i le lumanai.

E faavae vaega nei i luga o le faatuatuga, talitonuga mautinoa, ma le felagolagomai - ma e faatupu atili ai le vave faafoisia o le malosi i le atunuu ma lagolagoina ai lo tatou vave tali atu ma puipui i le malupuipua o le atunuu.

O le tele o vaega nei e fesootai, ma e lagolagoina la tatou vave tali atu faatasi, ma e faavae i tomiai tutusa o aafiaga ua tatou iloa e auala atu i faatalatalanoaga ma faipule, Māori, sui a le malo, tomiai suesue, pisinisi, ofisa faasalalau, taitai o nuu ma tagata ma sui o le mamalu o le atunuu.

O loo gasolo pea le tino mai o nisi o taumafaiga, mo se faataitaiga, e auala atu i le faia o se New Zealand's first National Security Strategy ma le toe iloiloina o la tatou faiga faavae i le malupuipua o le atunuu e tusa ma iuga ma fautuaga na maua mai i le Royal Commission of Inquiry i le osofaiga faaterorisi i le malumalu muselemi i Kalaiestetete. Peitai, e iai lo matou manatu o loo iai avanoa faapoopo e aogā ona tatou tilotilo i ai.

O vaega autu o se lumanai manuia e aofia ai:

- **Faailoa ma maua gofie faamatalaga lautele** - faasoaina atu faamatalaga ma ia faafaigofie ona maua ma faitau i ai tagata e siitia ai le iloa e le mamalu o le atunuu o aafiaga i le malupuipua o le atunuu, ma galuega o tatou faatinoa e tali atu ai ma auala e mafai e le mamalu o le atunuu ona fesoasoani e tuutiitia ma tali atu i ai. O se tulaga lea e mafai ai ona faapaleni le eseese o faamatalaga, ma lagolagoina le auai ai o tagata. O le faasoaina atu o faamatalaga i auala e maua gofie ai, e faatupu ai le vave faafoisia o le malosi o tagata e tusa ma faamatalaga sese ma le faasoia ma le mautinoa o faamatalaga sese e faatatau i le malupuipua o le atunuu.
- **Tausia o le malupuipua o le atunuu** - E lagolagoina Pule Sili o matātā o faatinoa galuega auā le malupuipua o le atunuu e galulue faatasi e vaavaai, mataala i mea e ono tutupu ma saunia fautuaga ma faatino galuega i luitau ma avanoa o agai mai, ina ia fesoasoani i faaiuga fai a le faigamalo o pulea le atunuu.

- **Faamalosia atili taitaiga a le malo i le malupuipua o le atunuu** - ia tutusa ma fautuaga o ta'ua i le Royal Commission of Inquiry i le osofaiga faaterorisi i le malumu muselemi i Kalaiestetete, ia atoatoa le silafia o minisita a le malo i mea o tutupu ma ia "faateleina felafolafoaiga, ma le lagolagosua a vaega faaupufai uma, mo mataupu i le malupuipua o le atunuu."¹¹
- **Faiga faapaaga faavaomalo e atiae ma faamalosia atili le malupuipua o le atunuu** - ia iloa lelei o mea o faamata'uina ai le malupuipua o le atunuu i le taimi nei ma le lumanai o mea atonu na foafoa mai isi vaipanoa o le atu laulau ma e tatau ai ona faia talatalaga faavaomalo ma faamaopopo se tali atu; ia mataala i le faasoaina o faamatalaga anagata, tomai ma tulaga na feagai ai ma ia galulue faatasi ma isi e tutusa a tatou aga tausili, auā o itu nei e tāua i le lagolagoina o le malupuipua o le atu laulau ma le itulagi, ma puipua mea o aiaina e lo tatou atunuu.
- **O se matātā o faatinoa galuega e malupuipua ai le atunuu ma e atagia ai le toatele o tagata eseese i lo tatou atunuu ma e mafai ona suia ma e gafatia ona tali atu i luitau i le lumanai** - o le a tulai mai se matātā ua faaaupegaina atoa i ituaiga tomai ma metotia eseese e taulimaina galuega auā le malupuipua o le atunuu, e gafatia ona tali atu i le lavelave o faaletonu faasaga i le malupuipua o le atunuu o loo tulai mai i lea taimi. O le a faaauau pea le suia o le taatiaga ma foliga o le matātā ia talafeagai ma suiga i totonu o Niu Sila. E faamausaliina atili metotia e faalauiloa ai faiga eseese ma le faaafia o tagata uma, ma e ave le eseese o tagata ma faiga ma a tatou malosiaga e tatau na tatou faaogaina. Matou te faailoa tulaga ua fautuaina e le Royal Commission of Inquiry mo le atiae o se matagaluega aoao ua anoa ona faaaupegaina auā le malupuipua o le atunuu, ma e faatonuina e tusa ma le tulafono, ma o le matafaioi a le matagaluega le faia o taitaiga mo le malupuipua ma le anoa o faamatalaga.
- **Ia leai se noataga o finauga i le va o Tagatanuu Niu Sila, e tusa ma fautuaga a tomai faapitoa e ese mai le malo** - ia maua e matātā tau aoaoga ma tomai faapitoa fesoasoani tupe o latou moomia e faia ai suesuega ma saunia ai fautuaga tutoatasi. O avanoa nei e siitia ai le malamalama o le mamalu o le atunuu ma lagolagoina felafolafoaiga anoa i auala e mafai na tatou tali atu ai i mau faiga faamata'u e afaina ai le malupuipua o le atunuu.
- **Mataala ma sogasoga ofisa faasalalau** - o faasalalauga i mataupu i le malupuipua o le atunuu e faatupu ai felafolafoaiga i faiga faamata'u i le malupuipua o le atunuu, taupulega mo le fia maua o mea e sili atu, faapea ma le iloa o malosiaga ma vaivaiga o faiga eseese. Ia atagia i faasalalauga le eseese ma le loa o manatu mai soo se vaega uma o Niu Sila ma ia manino lelei le faamatalaina o faiga faamata'u ma luitau, ma ia amanaia le vave faafoisia o le malosi o tatou tagata ma faamanatu luitau na tali faatasi atu i ai le atunuu atoa.
- **Amanaiaina ma galulue ma paaga i fafo atu o le malo** - o le a manino ma malamalama lelei i tomai faapitoa e maua mai le mamalu o le atunuu e fesoasoani e tuuaititia ma tali atu i luitau i le malupuipua o le atunuu. E aofia ai le galulue faatasi ma tagata Māori ma iloa le tāua o iwi, hapū ma aiga i le tausisia o le malupuipua o tagata. Ua faailoa mai foi ia i matou le mau atamai ma le tomai i matātā tau pisinisi ma tagata ma ua lava tapena e lagolago galuega e tali atu ai i mea o faamata'uina ai le malupuipua o le atunuu.
- **E lagona e tagata le uunaia ma le faaaupegaina o i latou e auai ma lagolago matātā i le malupuipua o le atunuu** - matou te iloa le tāua o le atiae o le faatuatuaaga ma le talitonuga mautinoa o le tasi Tagatanuu Niu Sila i le isi ma a tatou pulega. E uunaia, lagolagoina, ma

faatupeina le auai o tagata i mataupu mo le malupuipua o le atunuu e auala atu i le faasoaina o faamatalaga ma atiae le tomai e tusa ma ‘tulaga masani’ o se vaega i totonu o matātā i le malupuipua o le atunuu. E malamalama Tagatanuu Niu Sila i avanoa e mafai ai na auai i faiga faatemokarasi ma le faagasologa o galuega. O le saunia o faamatalaga e faaaupegaina ai tagata lautele o se tasi lea o avanoa autu (tomai faatekonolosi) ina ia iloa e tagata auala e faaso atu ai tulaga na fetaia’i ma i latou, tomai faapitoa ma manatu i le tau atinaega o taiala faavae e auala atu i talatalaga faitete.

- **Pulega faatuatuaina ma e noatia le tali atu** - o se faiga faavae i le malupuipua o le atunuu e maua ai e tagata le faatuatuaga ma le talitonuga mautinoa (o lona uiga, ‘faatulafonoina e tausi ma faatino galuega’) ma e sili atu ona aogā faatusa i se faiga faavae e lē o iai se malosiaga e faatino ai se galuega.

O le isi laasaga o sosoo ai?

Ua uma na folasia i luma o le Palemene le mataupu leni ma *lolomiina*. E i ai le faamoemoe e avea leni faamaumauga ma auala e faatupu manatu ai i taimi uma auā le talatalaina o mataupu i le malupuipua o le atunuu, aemaise faiga e fefaasoai ai ma ituaiga tupuaga eseese i Aotearoa Niu Sila e tusa ma lamatiaga i le malupuipua o le atunuu, luitau ma avanoa.

O tausaga taitasi e faia ai le National Security Public Survey ina ia maua e Tagatanuu Niu Sila se tofa loloto ma le malamalama i le tele o faiga faamata'u ma luitau eseese e afaina ai le malupuipua o le atunuu. O le faaauauina pea o le suesuega leni e maua ai avanoa e mataitu ma auiliili ai suiga e tulai mai.



Faamauga Faaopopo

Pepa Faaopoopo A - Uiga o Upu

E sa'o le faamatalaina o upu talu na faamauina ia Fepuari 2023.

Alalai mai o isi atunuu - O gaiogā a se isi atunuu ese, po o se sui, ma le faamoemoe e tosina, faalavelave pe faaleaogāina mea o aiaina e se atunuu e auala atu i faiga faalilolilo, faitogafiti po o le faamata'u. O le faamoemoe o le alofia po o le faaleaogāina o faiga masani e suia i maliega faavaomalo ina ia faatuputeleina ai lo latou malosi. E ui i auala faatoafilemu o faia e atunuu e aofia ai Niu Sila e faasili ai mea o latou aiaina, e avea pea le faaaogaina o faiga faitogafiti ma le fai faamalosi o loo aafia ai le malupuipua o le atunuu.

Faa-agaaga - E faatatau i le tele o faiga faatautala e aoina ai faamatalaga, mea po o tomā mo le faamoemoe e faatupu ai faiga faamaualuga i se isi o faatautavā i ai.

Faamatalaga sese - faamatalaga e lē moni pe taufaasese, ae e lē o faia pe faasoa atu ma le faamoemoe e faatupu ai lamatiaga

Faasalalau ma le mautinoa o faamatalaga sese - Faamatalaga sese po o le suia o faamatalaga ma le mautinoa ma faasoa atu ma le faamoemoe e faatupu ai lamatiaga po o se isi faamoemoe sili atu.

Faiga faaterorisi - Tulafono o aofia ai (ae e lē o faatapulaa i ai) gaiogā e mafua ai le maliu po o le faamanu'alia leaga tele ai o le tino ma le faamoemoe e faamata'uina se vaega o tagata po o le faafitafita ona faamalosi o le malo e fai (po o le lē faia) o se mea.

Felagolagomai - O tulaga e lagona ai e tagata uma le saogalemu, faatāuina ma le amanaiaina, ma le lagona talisapaia ma le mafai ona auai atoa i mea faitele. O se atunuu felagolagomai e iloa ai e tagata taitoatasi ma vaega o tagata le lagona talisapaia, faaofia i mea fai, auai, amanaia ma e agatonu ma tulafono.

Malupuipua o le atunuu - o lona uiga ia puipua Niu Sila mai faiga faamata'u tatou te afaina ai.

Osofaiga faainitaneti - soona fai ma le mautinoa o faiga faavae o teuina ai faamatalaga ina ia faaoo ai faiga lamatia.

Pulega faavaomalo e faavae i luga o tulafono - O se faiga faavae aoao i le lalolago e 'sa'o,' ma e aofia ai tulafono, aga taualoa ma faalapotopotoga o lagolagoina atunuu ia galulue faatasi, ma e maua mai ai le toafilemu, faiga e mafai ona mate'ia ma le maopoopo.

Soligatulafono faainitaneti - Soligatulafono e auala atu i le faaaogaina o komepiuta, ma e afaina sa'o ai faiga o faagaioia ai komepiuta. Mo se faataitaiga e aofia ai le saunia o polokalame faakomepiuta leaga, faafiti i osofaiga ua afaina ai nisi o auunaga, ma faiga taufaasese e auala atu **Soligatulafono maopoopo i le va o atunuu** - o se soligatulafono e faia i le va o tuaoi o atunuu, po o se soligatulafono e faia i se tasi o atunuu, ae e malosi sootaga i isi atunuu.

i imeli.

Tagata faatiga loto - O se tagata po o se faalapotopotoga o fai ma le mautinoa le faaoo o lamatiaga.

Talitonuga matuiā - o le taumafai e ta'u amiotonuina le faaaoga o sauaga ma le faamoemoe e suia atoa tulaga i totonu o faiga malo, talitonuga, po o se atunuu. O ituaiga sauaga faapenei e masani na lamalama i tagata o taumafai e lepetia pe taotaomia le ola po o le faaleaogāina o a latou talitonuga matuiā.

Totogi ola o polokalame faakomepiuta - O polokalame faakomepiuta e taofia tagata mai le maua o a latou faamaumauga po o polokalame tau komepiuta se'i vagana ua totogi atu se sala oti.

Pepa Faaopoopo B - Faamatalaga faaiu

- ¹ O matagaluega nei o aofia ai o le Department of the Prime Minister and Cabinet, Ministry of Foreign Affairs and Trade, New Zealand Security Intelligence Service, Ministry of Defence, Government Communications Security Bureau, New Zealand Customs Service, New Zealand Defence Force, New Zealand Police, ma le Ministry of Business, Innovation and Employment.
- ² E maua faamatalaga auiliili i le New Zealand's National Security System. Tagai i le <https://dpmc.govt.nz/our-programmes/national-security-and-intelligence/national-security/new-zealands-national-security>
- ³ E maua le lipoti o le suesuega i le uegatafailagi a le DPMC <https://dpmc.govt.nz/our-programmes/national-security/national-security-long-term-insights-briefing/2022-ipsos-national>. Na faatautaia le suesuega i luga o le initaneti e le IPSOS New Zealand mai le aso 11 Fepuari - 2 Mati 2022. O le vaitaimi tonu foi lea na osofaia ai Ukraine e Russia ma le Solo Tetee i le Palemene. E lē tau mate le aafia o manatu ma le tali atu o tagata ona o tulaga nei.
- ⁴ Stats NZ (2021) National ethnical population projections: 2018(base)-2043. Tagai i le <https://www.stats.govt.nz/information-releases/national-ethnic-population-projections-2018base-2043>
- ⁵ Microsoft (Iuni 2022). Defending Ukraine: Early Lessons from the Cyber War. Tagai i le <https://query.prod.cms.rt.microsoft.com/cms/api/am/binary/RE50KOK>
- ⁶ National Cyber Security Centre, Cyber Threat Report 2022/21. Tagai i le <https://www.ncsc.govt.nz/newsroom/ncsc-cyber-threat-report-shows-rise-in-malicious-attacks-on-new-zealand/>
- ⁷ CERT NZ. 2021 Report Summary. Tagai i le <https://www.cert.govt.nz/about/quarterly-report/2021-report-summary/>
- ⁸ Transnational Organised Crime in New Zealand: Our Strategy 2020 - 2025. Tagai i le <https://www.police.govt.nz/sites/default/files/publications/transnational-organised-crime-in-new-zealand-our-strategy-2020-to-2025.pdf>
- ⁹ Stats NZ (2012). Tamaiti ma aiga e lamatia gofie: O faamaumauga na maua mai le New Zealand General Social Survey. Tagai i le <https://www.stats.govt.nz/assets/Uploads/Retirement-of-archive-website-project-files/Reports/Vulnerable-children-and-families-Some-findings-from-the-New-Zealand-General-Social-Survey/vulnerable-children-and-families.pdf>
- ¹⁰ New Zealand Ministry of Defence (2021) Defence Assessment, He Moana Pukepuke E Ekengia E Te Waka, A Rough Sea Can Still be Navigated. Tagai i le <https://www.defence.govt.nz/assets/publication/file/Defence-Assessment-2021.pdf>
- ¹¹ Royal Commission of Inquiry i le osofaiga faaterorisi i le malumalu muselemi i Kalaiestetete 15 Mati 2019. Fuaiupu 2.3 Parakarafa 24,2. Fautuaga i le faaleleia o galuega e faatoilalo ai faiga faaterorisi i Niu Sila. Tagai i le <https://christchurchattack.royalcommission.nz/the->

report/findings-and-recommendations/chapter-2-recommendations-to-improve-new-zealands-counter-terrorism-effort/